



北史

卷九十三之
九十六

内閣文庫	
番號	漢 1836
冊數	500 (229)
函號	別 10 1



北史卷九十三

列傳第八十 章文庫

僭偽附庸

夏 赫連氏 燕 慕容氏 後秦 姚氏 北燕 馮氏

西秦 乞伏氏 北凉 沮渠氏 梁 蕭氏

晉自永嘉之亂寓縣瓜分胡羯憑陵積有年代各言膺
運歲居大寶竟而自相吞滅終為魏臣然魏自昭成已
前王迹未顯至如劉石之徒時代不接舊書為傳編之

四夷有欺耳目無益緡素且於時五馬浮江正朔未改
陽秋記注具存紀錄雖朝政叢脞而年代已多太宗文
皇帝爰動天文大存刊勒其時事相接已編之載記今
斷自道武已來所吞併者序其行事紀其滅亡其餘不
相關涉皆所不取至如晉宋齊梁雖曰偏據年漸三百
鼎命相承魏書命曰島夷列之於傳亦所不取故不入
今篇蕭譽雖云帝號附庸周室故從此編次爲僭僞附
庸傳云介

鐵弗劉武南單于苗裔左賢王去卑之孫北部帥劉猛
之從子居於新興虎意之北北人謂胡父爲鮮卑毋爲

鐵弗因以號爲姓武父誥汁爰世領部落汁爰死武代
焉武死子務桓代領部落與魏和通務桓死弟闕陋頭
代立密謀反叛後務桓子悉勿祈逐闕陋頭而立悉勿
祈死弟衛辰代立衛辰務桓之第三子也旣立遣子朝
獻昭成以女妻之衛辰潛通苻堅堅以爲左賢王遣使
請堅求田地春去秋來堅許之後乃背堅專心歸魏舉
兵伐堅堅遣其將鄧羗討禽之堅自至朔方以衛辰爲
夏陽公統其部落衛辰復附於堅昭成討大破之遂走
奔苻堅堅送還朔方遣兵戍之昭成未衛辰導苻堅寇
魏南境王師敗績堅遂分國人爲二部自河以西屬之

衛辰自河以東屬之劉庫仁堅後以衛辰為單于督攝河西新類屯於代來慕容永據長于拜衛辰使持節都督河西諸軍事大將軍朔州牧朔方王姚萇亦遣使結好拜衛辰使持節都督北朔雜夷諸軍事大將軍大單于河西王幽州牧登國中衛辰遣子直力鞬寇南部其衆八九萬道武軍五六千人為其所圍帝乃以車為方營並戰並前大破之於鐵岐山南直力鞬單騎而走帝乘勝追之自五原金津南度河徑入其國遂至衛辰所居悅跋城衛辰父子驚遁乃分遣陳留公元虔南至白鹽池虜衛辰家屬將軍伊謂至木根山禽直力鞬衛辰軍騎遁走為其部下所殺傳首行宮先是河水赤如血衛辰惡之及衛辰之亡誅其族類並投之於河衛辰第三子屈丐奔薛于部帥太悉伏屈丐本名敦敦明元改其名曰屈丐北方言屈丐者卑下也太悉伏送之姚興興高平公破多羅沒奔于妻之以女屈丐身長八尺五寸興見而奇之拜驍騎將軍加奉車都尉常參軍國大議寵遇踰於勳舊興弟濟南公邕言於興曰屈丐天性不仁難以親育寵之太甚臣竊惑之興曰屈丐有濟世之才吾方收其藝用與之共平天下有何不可乃以屈丐為安遠將軍封陽川侯使助沒奔于鎮高平邕固諫

以爲不可興乃止以屈丐爲持節安北將軍五原公配
以三交五部鮮卑二萬餘落鎮朔方道武末屈丐襲殺
沒奔干而并其衆僭稱大夏天王號年龍昇置百官興
乃憐之屈丐耻姓鐵弗遂改爲赫連氏自云徽赫與天
連又號其支庶爲鐵伐氏云族剛銳如鐵皆堪伐人晉
將劉裕攻長安屈丐聞而喜曰姚泓豈能拒裕裕必尅
之待裕去後吾取之如拾遺耳於是秣馬勵兵休養生
卒及劉裕禽泓留子義真守長安屈丐伐之大破義真
積人頭爲京觀號曰彌鞞臺遂僭皇帝於灊上號年爲
昌武定都統萬勒銘城南頌其功德以長安爲南郡性

儻虐視人如草蒸土以築城鐵錐刺入一寸卽殺作人
而并築之所造兵器匠呈必死射甲不入卽斬弓人如
其入便斬鎧匠殺工匠數千人常居城上置弓劍於側
有所嫌忿手自殺之羣臣忤視者鑿其目笑者決其脣
諫者謂之誹謗先截其舌而後斬之議廢其子瓚瓚自
長安起兵攻屈丐丐遣子太原公昌破瓚殺之屈丐以
昌爲太子始光二年屈丐死昌僭立昌字還國一名折
屈丐之第二子也旣僭位改年承光太武聞屈丐死諸
子相攻關中大亂於是西伐乃以輕騎一萬八千濟河
襲昌時冬至之日昌宴饗王師奄到上下驚擾車駕次

於黑水去其城三十餘里昌乃出戰太武馳往擊之昌
退走入城未閉門軍士乘勝入其西宮焚其西門夜宿
城北明日分軍四出徙萬餘家而還後昌遣弟定與司
空奚斤相持於長安太武乘虛西伐濟君子津輕騎三
萬倍道兼行羣臣咸諫曰統萬城堅非一日可拔今輕
軍討之進不可尅退無所資不若步軍攻具一時俱往
帝曰夫用兵之術攻城最下不得已而用之如其攻具
一時俱往賊必懼而堅守若攻不時拔則食盡兵疲外
無所掠非上策也朕以輕騎至其城下彼先聞有步軍
步從見騎至必當心閉朕且羸師以誘之若得一戰禽

之必矣所以然者軍士去家二千里後有黃河之難所
謂置之死地而後生也以是決戰則有餘攻城則不足
遂行決於黑水分軍伏於谷而以少衆至其城下昌將
狄子玉來降說使人追其弟定定曰城堅峻未可攻拔
待禽斤等然後徐往內外擊之有何不濟昌以爲然太
武惡之退軍城北示昌以弱遣永昌王健及娥清等分
騎五千西掠居人會軍士負糗亡入昌城言官軍糧盡
士卒食菜輜重在後步兵未至擊之爲便昌信其言引
衆出城步騎三萬司徒長孫翰等咸言昌步陣難陷宜
避其鋒且待步兵一時奮擊帝曰不然遠來求賊恐其

不出今避而不擊彼奮我弱非計也遂收軍僞北引而
疲之昌以爲退鼓譟而前舒陣爲翼行五六里帝衝之
賊陣不動稍前行會有風起方術官趙倪勸帝更待後
日崔浩叱之帝乃分騎爲左右以倚之帝墜馬賊已逼
帝騰馬刺殺其尚書斛黎文殺騎賊十餘人流矢中帝
帝奮擊不輟昌軍大潰不及入城奔投上邽遂尅其
城初屈丐奢好脩宮室城高十仞基厚三十步上廣十
步宮牆五仞其堅可以礪刀斧臺榭高大飛閣相連皆
彫鏤圖畫被以綺繡飾以丹青窮極文采帝顧謂左右
曰蕞尔小國而用人如此雖欲不亡其可得乎侍御史

安胡禽昌帝使侍中古弼迎昌至京師舍之西宮門內給
以乘輿之副又詔昌尚始平公主假會稽公封爲秦王坐
謀反伏誅昌弟定小字直犢屈丐之第五子也凶暴無賴
昌敗定奔於平涼自稱尊號改年勝光定登陰槃山望其
本國泣曰先帝以朕承大業者豈有今日之事乎使天假
朕年當與卿諸人建季興之業俄而羣狐百數鳴於其側
定命射之無所獲惡之曰所見亦大不臧咄咄天道復何
言哉定與宋連和遙分河北自恒山以東屬宋恒山以西
屬定太武親率輕騎襲平涼定救平涼方陣自固帝四面
圍之斷其水草定不得水引衆下原詔武衛將軍丘眷擊

北史卷九十三
之定衆潰被創單騎遁走收其餘衆乃西保上邽神
麴四年爲吐谷渾慕容瓚所襲禽定送京師伏誅
徙河慕容廆字奕洛瓌本出昌黎曾祖莫護跋魏祖
率諸部落入居遼西從司馬宣王討公孫氏拜率義
王始建王府於棘城之北祖木延母丘儉征高麗有
功始號左賢王父涉歸以勳進拜鮮卑單于遷邑遼
東涉歸死廆代領部落以遼東僻遠遷於徒河之青
山穆帝世頗爲東部之患廆死子晃嗣晃字元眞號
年爲元年自稱燕王建國二年昭成納晃女爲后四年
晃城和龍而都焉征高麗大破之遂入丸都掘高麗

王釗父利墓載其屍焚其宮室毀丸都而歸釗後稱臣
乃歸其父屍晃死子儁嗣儁字宣英旣襲位號年爲元
年聞石氏亂乃礪甲嚴兵將爲進取之計徙都於薊建
國十五年儁僭稱皇帝置百官號年天璽國稱大燕十
六年自薊遷都於鄴號年光壽儁死第三子暉嗣暉字
景茂號年建熙暉政無綱紀有神降於鄴曰湘女有聲
與人相接數日而去後苻堅遣將王猛伐鄴禽暉封新
興侯道武之七年苻堅敗於淮南暉叔父垂叛堅攻苻
丕於鄴暉弟濟北王泓先爲北地長史聞垂攻鄴亡奔
關東還屯華陰自稱雍州牧濟北王推垂爲丞相大司

馬吳王堅遣子鉅鹿公叡伐泓泓弟中山王冲先爲平陽太守亦起兵河東奔泓泓衆至十萬遣使謂堅求分王天下堅大怒責暉暉叩頭流血謝堅待之如初命暉以書招垂及泓冲暉密遣使謂泓勉建大業可以吳王爲相國中山王爲太宰領大司馬汝可爲大將軍領司徒承制封拜聽吾死問汝便卽尊位泓進向長安年號燕興泓謀臣高蓋宿勒崇等以泓德望後冲且持法苛峻乃殺泓立冲爲皇太弟承制行事置百官進據阿房初堅之滅燕冲姊清河公主年十四有殊色堅納之冲年十二亦有龍陽之姿堅又幸之姊弟專寵長安歌之

曰一雌一雄雙飛入紫宮王猛切諫乃出冲及其母卒葬之以燕后之禮長安又謠曰鳳凰鳳凰止阿房時以鳳凰非梧桐不棲非竹實不食乃蒔梧桐數千株於阿城以待鳳凰冲小字鳳凰至是阿城終爲堅賊暉入見堅謝因言二子昨婚欲堅幸第堅許之暉出術士王嘉曰椎蘆作蘆蔭不成文章會天大雨不得殺羊言暉將殺堅而不果也堅與羣臣莫解是夜大雨晨不果出事發堅乃誅暉父子及宗族城內鮮卑無少長男女皆殺之虜弟運運孫永字叔明暉旣爲符堅所并永徙於長安家貧夫妻常賣鞞於市及暉爲堅所殺冲乃自稱尊

號以永爲小將軍冲毒暴及堅出如五將山冲入長安
縱兵大掠死者不可勝計初堅之未亂關中忽然無火
而煙氣大起方數十里月餘不滅堅每臨聽訟觀令民
有怨者舉煙於城北觀而錄之長安爲之語曰欲得必
存當舉煙關中謠曰長鞞馬鞭擊左股太歲南行當復
虜西人呼徒河爲白虜冲果據長安樂之忘歸且以慕
容垂威名夙著跨據山東憚不敢進衆咸怨之登國元
年冲左將軍韓延因人之怨殺冲立冲將段隨爲燕王
改年昌平冲之人長安王嘉謂之曰鳳凰鳳凰何不高
飛還故鄉無故在此取滅亡冲敗其左僕射慕容恒與

永潛謀襲殺隨立宣都王子觀爲燕王號年建明事解
甲男女三十餘萬口乘輿服御禮樂器物去長安而東
以永爲武衛將軍恒弟護軍將軍韜陰有貳志誘覲殺
之於臨晉恒怒去之永與武衛將軍刁雲率衆攻韜韜
遣司馬宿勤黎逆戰永執而戮之韜懼出奔恒營恒立
慕容冲子望爲帝改年建平衆悉去望奔永永執望殺
之立慕容泓子忠爲帝改年建武忠以永爲太尉守尚
書令封河東公東至聞喜知慕容垂稱尊號託以農要
弗進築燕熙城以自固刁雲等又殺忠推永爲大都督
大將軍大單于雍秦梁涼四州牧河東王稱蕃於垂永

進據長子僭稱帝號年中與垂攻丁零翟釗於滑臺釗
敗降永永以釗爲車騎大將軍東郡王歲餘謀殺永永
誅之垂來攻永永敗爲前驅所獲垂數而戮之并斬永
公卿已下刁雲大逸豆歸等四十餘人永所統新舊人
戶服御圖書器樂珍寶垂悉獲之垂字道明晃第五子
也甚見寵愛常自謂諸弟子曰此兒闊達好奇終能破
人家或能成人家故名霸字道業恩遇踰於雋雋弗能
平及卽王位以垂墜馬傷齒改名爲缺外以慕缺缺爲
名內實惡之尋以讖記之文乃去夬以垂爲名年十三
爲偏將所在征伐勇冠三軍雋平中原垂爲前鋒累戰

有大功及雋僭尊號封吳王後以車騎大將軍敗桓温
於枋頭威名大震不容於暉西奔符堅堅甚重之拜冠
軍將軍封賓都侯堅敗淮南入於垂軍子寶勸垂殺之
垂以堅遇之厚也不聽行至洛陽請求拜基堅許之遂
起兵攻符丕於鄴垂稱燕王置百官年號燕元登國元
年垂僭位號年爲建興繕宗廟社稷於中山盡有幽冀
平州之地遣使朝貢三年道武遣九原公儀使於垂垂
又遣使朝貢四年道武遣陳公虔使於垂垂又遣使朝
貢五年又遣秦王觚使於垂垂留觚不遣遂絕行人垂
議討慕容永太史令靳安言於垂曰彗星經尾箕之分

燕當有野死之王不出五年其國必亡歲在鶉火必尅
長子垂乃止安出而謂人曰此衆既并終不能久安蓋
知道武之興也而不敢言先是丁零翟遼叛垂後遣使
謝皐垂不許遼怒遂自號大魏天王屯滑臺與垂相擊
死子釗代之及垂征尅滑臺釗奔長子垂議征長子諸
將咸諫以永國未有釁請他年垂將從之垂弟司徒范
陽王德固勸垂垂曰司徒議與吾同且吾投老叩囊底
資足以尅之不復留逆賊以累子孫乃伐永尅之十年
垂遣其太子寶來寇始寶之來垂已有疾自到五原道
武斷其行路父子問絕帝乃詭其行人之辭臨河告之

曰汝父已死何不遽還寶兄弟聞之憂怖以爲信然於
是士卒駭動初寶至幽州其所乘車軸無故自折占工
靳安以爲大凶固勸令還寶怒不從至是問安安曰速
去可免寶愈恐安退告人曰今將死於他鄉尸骸委於
草野爲鳥爲螻蟻所食不復見家族十月寶燒船夜遁
時河冰未成寶謂帝不能度不設斥候十一月天暴風
寒冰合帝進軍濟河急追之至參合陂西靳安言於寶
曰今日西北風動是軍將至之應宜兼行速去不然必
危其夜帝部分衆軍東西爲犄角之勢約勒士卒束馬
口銜枚無聲昧爽衆軍齊進日出登山下臨其營寶衆

晨將東引顧見軍至遂驚擾帝縱騎騰蹕皆馬者蹶倒冰
上寶及諸父兄弟軍馬迸散僅以身免寶軍四五萬人
一時放仗歛手就羈禽其王公文武數千垂復欲來寇
太史曰太白夕沒西方數日後見東方此爲躁兵先舉
者亡垂不從鑿山開道至寶前敗所見積骸如丘設祭
弔之死者父兄子弟途皆嗥哭聲震山川垂慙忿嘔血
發病而還死於上谷寶僭立寶字道裕垂之第四子也
少輕果無志操好人佞已爲太子砥礪自脩垂妻段氏
謂垂曰寶姿質雍容柔而不斷承平則爲仁明之主處
難則非濟世之雄今託以大業未見克昌之美遼西高
陽兒之後賢者宜擇一以樹之趙王麟姦詐負氣常有
輕寶之心恐難作垂不納寶聞深以爲恨寶既僭位年
號永康遣麟逼其母段氏自裁段氏怒曰汝兄弟尚逼
殺母安能保社稷吾豈惜死遂自殺寶議以后謀廢嫡
稱無母之道不宜成喪羣臣咸以爲然寶中書令睦遂
執意抗言寶從之而止皇始元年道武南伐及尅信都
寶大懼夜來犯營帝擊破之寶走中山遂奔薊寶子清
河王會先守龍城聞寶被圍率衆赴難逢寶於路寶分
奪其軍以授弟遼西王農等會怒襲農殺之勒兵攻寶
寶走龍城會追圍之侍御郎高雲襲敗會師會奔中山

寶命雲爲子封夕陽公會至中山爲慕容普隣所殺寶
至龍城垂舅蘭汗拒之寶南走奔薊汗復遣迎寶以汗
垂之季舅子盛又汗之婿也必謂無二乃還龍城汗殺
之及子策等百餘人汗自稱大都督大單于昌黎王號
年青龍以盛子塔哀而宥之盛字道運寶長子也垂封
爲長樂公寶僭立進爵爲王蘭汗之殺寶也以盛爲侍
中左光祿大夫盛乃聞汗兄弟使相疑害李早衛雙劉
志張真等皆盛之舊昵汗太子穆並引爲腹心盛結早
等因汗穆等醉夜襲殺之僭尊號改年爲建平又號年
爲長樂盛改稱庶人大王盛以寶聞而不斷遂峻極威

刑於是上下震局前將軍段熲等夜鼓噪攻盛傷之遂
輦昇殿召叔父河間公熙屬以後事熙未至而死熙字
道文小字長生垂之長子也羣臣與盛伯母丁氏議以
其家多難宜立長君遂廢盛子定迎熙立之熙立殺定
年號光始築龍騰苑起雲山於苑內又起逍遙宮甘露
殿連房數百觀閣相交鑿天河渠引水入宮又爲妻符
氏鑿曲光海清涼池季夏盛暑不得休息賜死者大半
熙遊城南止大柳樹下若有人呼曰大王且止熙惡之
伐其樹下有蛇長丈餘熙盡殺寶諸子改年爲建始又
爲其妻起承華殿負土於北門土與穀同價典軍杜靜

載棺詣闕上書極諫熙大怒斬之熙妻當季夏思凍魚
膾仲冬須生地黃切責不得加有司大辟符氏死熙擁
其屍僵仆絕息久而乃蘇悲號擗躄斬衰食粥大歛之
後復啓而交接制百官哭臨沙門素服令有司案檢有
淚者爲忠無淚者辜之羣臣莫不啜辛以爲淚及葬熙
被髮徒步從轎車毀城門而出長老相謂曰慕容氏自
毀其門將不久矣衛中將軍馮跋兄弟閉門拒熙執而
殺之立夕陽公雲爲主雲寶之養子也復姓高氏年號
正始跋又殺雲自立雲之立也熙幽州刺史上庸公慕
容懿以遼西歸降道武以懿爲征東大將軍平州牧昌

黎王後坐反伏誅晃少子德字玄明雅爲兄聖所重符
堅滅暉以德爲張掖太守垂僭號封范陽王位司徒寶
卽位以德鎮鄴大丞相寶旣東走羣僚勸德稱尊號德
不從皇始二年旣拔中山道武遣衛王儀攻鄴德南走
滑臺自稱燕王號年燕元置百官德冠軍將軍符廣叛
於乞活壘德留兄子和守滑臺率衆攻廣斬之而和長
史李辯殺和以城降魏德無所據用其尚書潘聰計據
青齊入都廣固僭稱尊號號年建平女水竭德聞而惡
之因而寢疾兄子超請祈文水德曰人君之命豈女水
所知乃以超爲太子德死超僭立超字祖明德兄北海

王納之子也既僭位號年太上超南郊柴燎焰起而煙
不出靈臺令張光告人曰今火盛而煙滅國其亡乎天
賜五年晉將劉裕伐超超將公孫五樓勸拒之於大峴
不從裕入大峴超戰於臨朐為裕敗退還廣固圍之廣
固鬼夜哭有流星長十餘丈墮於廣固城濱裕執超送
建康市斬之

姚萇字景茂出於南安赤亭燒當之後也祖柯剋助魏
掎姜維於沓中以功假綏戎校尉西羌都督父弋仲晉
永嘉之亂東徙榆眉劉曜以弋仲為平西將軍平襄公
後隨石季龍遷於清河灑頭勒以弋仲為奮武將軍封

襄平公弋仲死子襄代屯於譙城慕容儁以襄為豫州
刺史丹陽公屯淮南自稱大將軍大單于為晉將桓溫
所敗奔河東後為苻眉所殺弋仲有子四十二人萇第
二十四隨兄襄征伐襄甚奇之襄敗降於苻堅從堅征
伐頗有功堅伐晉以萇為龍驤將軍督益守梁州諸軍
事謂萇曰朕本以龍驤建業龍驤之號初未假人今特
以相授山南之事一以委卿堅左將軍竇衝進曰王者
無戲言此亦不臧之徵也惟陛下察之堅默然及慕容
泓起兵華澤堅遣子衛大將軍獻討之戰敗為泓所殺
時萇為獻司馬懼羣奔馬牧聚眾萬餘自稱大將軍大

單于萬年秦王號年白雀數月之間衆至十餘萬與慕容冲連和進屯北地符堅出五將山長執而殺之登國元年僭稱皇帝置白宮國號大秦年曰建初改長安曰常安以其太子興鎮之白擊符登於安定敗之長病夢符堅將天官使者鬼兵數百突入營中長懼走後宮宮人迎長刺鬼誤中長陰鬼相謂曰正中死處拔矛出血石餘寤而驚悸遂患陰腫刺之出血如夢長乃狂言或稱長殺陛下者臣兄襄非臣之臯願不枉法長死子興襲位秘不發喪興字子略長長子也既滅符登然後發喪行服僭稱皇帝年號皇初天興元年興去皇帝之號降稱天王號年洪始興尅洛陽以其弟東平公紹鎮之三年興遣使來聘道武遣謁者僕射張濟使於興天興五年復興遣其弟義陽公平率衆四萬侵平陽攻乾壁六十餘日陷之七月車駕親征八月次永安平募遣勇將率精騎二百闕軍爲前鋒將長孫肥所禽匹馬不反平遂退走帝急追及於柴壁圍之興乃悉舉其衆救平帝增築重圍內以防平之出外以距興之人又截汾曲爲南北浮橋乘西岸築圍帝帥師度蒙阮南四十里逆擊興興晨行北引未及安營大軍卒至興衆怖擾帝知興氣挫乃南絕蒙阮之口東杜新坂之隘守天度屯賈

山令平水陸路絕將坐甲而禽之又令緣汾帶岡樹柵以衛芻牧者九月興從汾西北下憑壑爲壘以自固興又將數千騎乘西橋官軍鈎取以爲薪蒸興還壘道武度其必攻西圍乃命脩塹增廣之至夜興果來攻梯短不及棄之壘中而還興又分其衆臨汾爲壘叩逼水門與平相望帝因截水中興內外隔絕士衆喪氣於是平糧盡窘急夜悉衆將突西南而出興列兵汾西舉烽鼓譟爲平接援帝簡諸軍精銳屯汾西固守南絕水口興夜聞聲望平力戰突免平聞外鼓望興攻圍引接故但叫呼虛相應和莫敢逼圍平不得出窮逼乃將二妾赴

水死興安遠將軍不蒙世揚武將軍雷重等將士四千餘人隨平投水帝令泗水鈎捕無得免者平衆三千餘人皆斂手受執禽興尚書右僕射狄伯友已下四十餘人興遠來救自觀其窮力不能免舉軍悲號震動山谷數日不止頻遣使請和帝不許乃班師興還長安有雀數萬頭鬪於興廟毛羽折落多有死者月餘乃止識者曰今雀鬪廟上子孫當有爭亂者乎又興殿有聲如牛响有二狐入長安一登興殿屋走入宮一人市求之不得永興三年興遣周寶來聘五年興遣使來聘并請進女明元許之神瑞元年興遣兼散騎常侍尚書吏部郎

北史卷六十三 列傳 二十七
嚴康來聘二年興遣散騎常侍東武侯姚敞尚書姚軌
奉其西平公主於明元明元以后禮納之泰常元年興
死長子泓字元子僭位號年永和晉將劉裕伐泓長驅
入關泓戰敗請降裕執之於建康斬之

馮跋字文起小名乞直代本出長樂信都慕容永僭號
長子以跋父安爲將永爲垂所滅安東徙昌黎家於長
谷遂同夷俗跋飲酒至一石不亂諸弟皆不脩行業唯
跋恭慎慕容熙僭號以跋爲殿中左監稍遷衛中將軍
後坐事逃亡旣而熙政殘虐人不堪命跋乃與從兄萬
泥等二十二人結謀跋與二弟乘車使婦人御潛入龍

城匿於孫護之室以誅熙乃立夕陽公高雲爲主雲以
跋爲侍中征北大將軍開府儀同三司封武邑公事皆
決跋兄弟明元初雲爲左右所殺跋乃自立爲燕王置
百官號年大平於時永興元年也跋撫納契丹等諸落
頗來附之明元遣謁者於什門諭之爲跋所留太常三
年和龍城有赤氣蔽日自寅至申跋太史令張穆以爲
兵氣勸跋還魏使奉脩職貢跋不從明元詔征東大將
軍長孫道生討之跋嬰城固守道生不剋而還神麤二
年跋有疾其長子永先死立次子翼爲世子攝國事勒
兵以備非常跋娶宋氏規立其子受居深忌翼謂之曰

主上疾將瘳奈何代父臨國乎翼遂還宋氏矯絕內外
遣闢人傳問翼及跋諸子大臣並不得省疾唯中給事
胡福獨得出入專掌禁衛跋疾甚福慮宋氏將成其計
乃言於跋弟弘勒兵而入跋驚怖而死弘襲位翼勒兵
出戰不利遂死跋有子男百餘人悉爲弘所殺弘字文
通跋之少弟也跋立爲尚書右僕射封中山公領中領
軍內掌禁衛外摠朝政歷位司徒及自立乃與宋氏通
和延和元年太武親討之弘嬰城固守其營丘遼東成
周樂浪帶方玄菟六郡皆降太武徙其人三萬餘家於
幽州其尚書郭深勸之歸誠進女乞爲附庸保守宗廟

弘曰負豐在前忿形已露降取死不如守志更圖所
適也先是弘廢其元妻王氏黜世子崇令鎮肥如以後
妻慕容氏子曰王仁爲世子崇母弟廣平公朗樂陵公
邈相謂曰禍將至矣於是遂出奔遼西勸崇來降崇納
之會太武使給事中王德陳示成敗崇遣邈入朝太武
封崇遼西王錄其國尚書事遼西十郡承制假授文官
尚書刺史武官征虜已下弘遣其將封羽率衆圍崇太
武詔永昌王徼督諸軍救之封羽又以九城降徙其人
三千餘家而還弘遣其尚書高顯請臯乞以季女克掖
庭帝許之徵其子王仁入朝弘不遣其散騎常侍劉訓

諫弘大怒殺之太武又詔樂平王丕等討之日就感削
上下危懼弘太常陽嶧復勸弘請舉乞降令王仁入侍
弘不聽乃密求迎於高麗太延二年高麗遣將葛居盧
等率衆迎之弘乃擁其城內士女入於高麗先是其國
有狼夜繞城羣嗥如是終歲又有鼠集於城西鬪滿數
里西行至水則在前者銜馬矢迭相齧尾而度宿軍地
然一旬而滅觸地生蛆月餘乃止和龍城生白毛一尺
二寸弘至遼東高麗遣使勞之曰龍城王馮若爰適野
次士馬勞乎弘慙怒稱制答讓之高麗乃處之於平郭
尋徙北豐弘素侮高麗政刑賞罰猶如其國高麗乃奪
其侍人質任王仁弘忿怨之謀將南奔太武又徵弘於
高麗乃殺之於北豐子孫同時死者十餘人弘子朗邈
朗子熙在外戚傳

乞伏國仁隴西人也其先弗如自漠北南出五世祖佑
隣并兼諸部衆漸盛父司繁擁部落降苻堅堅以爲南
單于又拜鎮西將軍鎮勇士川司繁死國仁爲將軍及
堅敗國仁叔步頽叛於隴右堅令國仁討之步頽大悅
迎而推之部衆十餘萬道武時私署大都督大將軍大
單于秦河二州牧號年建義署置官屬分部內爲十一
郡築勇士城以都之國仁死弟乾歸統事自署大都督

大將軍大單于河南王改年爲太初置百官登國中遷於金城城門自壞乾歸惡之遷於苑川尋爲姚興所破又奔枹罕遂降姚興拜爲河州刺史封歸義侯尋追還苑川乾歸乃背姚興私稱秦王置百官號年更始遣使請援元明許之田于五溪有梟集其手誅爲其兄子公府所殺子熾盤殺公府代統任熾盤自稱大將軍河南王改年爲永康後龔禿髮儁檀於樂都滅之乃私署秦王置百官改年爲建弘後遣其尚書郎莫者胡積射將軍乞伏又寅貢金二百斤請伐赫連昌太武許之及統萬事平熾盤乃遣其叔平遠將軍泥頭弟安遠將軍安度質於京師又使其中書侍郎王愷丞相從事中郎烏訥闐奉表貢其方物熾盤死子慕末統任慕末字安石跋旣立改年爲永弘其尚書隴西辛進嘗隨熾盤遊後園進彈鳥丸誤傷慕末母面至是誅進五族二十七人慕末弟殊羅蒸熾盤左夫人禿髮氏慕末知而禁之殊羅與叔父什夤謀殺慕末使禿髮氏盜門簾簾誤門不開門者以告慕末收其黨盡殺之欲鞭什夤什夤曰我負汝死不負汝鞭慕末怒剝其腹投屍於河什夤母弟白養及去列頗有怨言又殺之政刑酷濫內外崩離部人多叛後爲赫連定所逼遣王愷烏訥闐請迎於太武

北史卷九十三 齊書 三十一
太武許以安定以西平涼以東封之慕末乃焚城邑毀
寶器率戶萬五千至高田谷爲赫連定所拒遂保南安
太武遣師迎之慕末衛將軍吉毗固諫以爲不宜內徙
慕末從之赫連定遣其北平公韋代率衆萬人攻南安
城內大饑人相食神麋四年慕末及宗族五百餘人出
降送於上邽遂爲定滅

大沮渠蒙遜本張掖臨松盧水人也匈奴有左沮渠官
蒙遜之先爲此職羗之酋豪曰大故以官爲氏以大冠
之世居盧水爲酋豪遜高祖暉仲歸曾祖遮皆雄健有
勇名祖郝復延封伏地王父法弘襲爵苻氏以爲中田
護軍蒙遜代父領部曲有勇略多計數頗曉天文爲諸
胡所推服呂光自王於涼土使蒙遜自領營人配箱直
又以蒙遜叔父羅仇爲西平太守後遣其子慕率羅仇
伐乞伏乾歸於枹罕爲乾歸所敗殺之蒙遜求還葬羅
仇因聚衆屯金山與從兄晉昌太守男成共推建康太
守段業爲使持節大都督龍驤大將軍涼州牧建康公
稱神璽元年業以蒙遜爲張掖太守封臨池侯男成爲
輔國將軍委以軍國之任業又自稱涼王以蒙遜爲尚
書左丞忌蒙遜威名微踈遠之天興四年蒙遜內不自
安請爲西安太守蒙遜欲激怒其衆乃密誣告男成叛

逆業殺之蒙遜泣而告衆陳欲復讎之意男成素有恩
信衆情怨憤泣而從之蒙遜因舉兵攻殺業私署使持
節大都督大將軍涼州牧張掖公年號永安居張掖是
月涼武昭王亦起兵年號庚子永興中蒙遜尅姑臧遷
居之改號玄始元年自稱河西王置百官頗遣使朝貢
蒙遜寢於新臺關人王懷祖斫蒙遜傷足蒙遜妻孟氏
禽懷祖斬之及聞晉滅姚泓怒甚有校郎言事於蒙遜
蒙遜曰汝聞劉裕入關敢研研然也遂殺之尋稱藩於
晉泰常中蒙遜尅燉煌改年承玄後又稱藩於宋并求
書宋文帝並給之蒙遜又就宋司徒王弘求搜神記弘

與之神麈中遣尚書郎宗弼左常侍高猛朝貢上表稱
臣前後貢使相望後遣子安周內侍太武遣兼太常李
順持節拜蒙遜爲假節加侍中都督涼州西域羗戎諸
軍事太傅行征西大將軍涼州牧涼王使崔浩爲冊書
以褒賞之蒙遜又改義和元年延和二年四月蒙遜死
詔遣使監護喪事私諡武宣王蒙遜性淫忌忍於刑戮
閨庭之中略無風禮第三子牧犍統任自稱河西王遣
使請朝命并遣使通宋受宋褻授先是太武遣李順迎
蒙遜女爲夫人會蒙遜死牧犍受蒙遜遺意送妹於京
師拜爲右昭儀改稱承和元年太武又遣李順拜牧犍

爲使持節侍中都督涼沙河三州西域羗戎諸軍事車
騎將軍開府儀同三司領護西戎校尉涼州刺史河西
王牧犍以無功受賞乃留順上表乞安平一號優詔不
許牧犍尚太武妹武威公主遣其相宋繇表謝獻馬五
百匹黃金百斤繇又表請公主及牧犍母妃后定號朝
議謂禮母以子貴妻從夫爵牧犍母宜稱河西國太后
公主於國內可稱王后於京師則稱公主詔從之牧犍
遣建節將軍沮渠旁周朝京師太武遣侍中古弼尚書
李順賜其侍臣衣服有差并徵世子封壇入侍牧犍乃
遣封壇朝京師太延五年太武遣尚書賀羅使涼州且

觀虛實帝以牧犍雖稱藩致貢而內多乖悖於是親征
之詔公卿爲書讓之數其辜十二官軍濟河牧犍曰何
故余也用其左丞姚定國計不肯出迎求救於蠕蠕遣
大將董來萬餘人拒軍於城南戰退車駕至姑臧遣使
喻牧犍令出牧犍聞蠕蠕內侵無善幸車駕返旆遂嬰
城自守牧犍兄子祖踰城出降具知其情太武乃引諸
軍進攻牧犍兄子萬年率麾下又來降城拔牧犍與左
右文武面縛請臯詔釋其縛徙涼州人三萬餘家於京
師初太延中有一老父投書於燉煌城東門忽然不見
其書紙八字文曰涼王三十年若七年又於震電所得

石州書曰河西河西三十年破帶石樂七年帶石青山
名在姑臧南山祀傍泥陷不通牧犍征南大將軍董來
曰祀豈有知乎遂毀祀伐木通道而行牧犍立果七年
而滅初牧犍淫嫂李氏兄弟三人傳嬖之李與牧犍姊
共毒公主上遣醫乘傳救公主得愈上徵李氏牧犍不
遣厚送居於酒泉上大怒既尅猶以妹壻待之其母死
以王太妃禮葬焉又爲蒙遜置守冢三十家授牧犍征
西大將軍王如故初官軍未入之間牧犍使人研開府
庫取金銀珠玉及珍竒器物不更封閉百姓因之入盜
巨細蕩盡有司求賊不得真君八年其所親人及守藏
者告之乃窮竟其事搜其家中悉得所藏器物又告牧
犍父子多畜毒藥前後隱竊殺人乃有百數姊妹皆爲
左道朋行淫佚曾無愧顏始劉賓沙門曰曇無讖東人
鄯善自云能使鬼療病令婦人多子與鄯善王妹曇頭
陀林淫通發覺亡奔涼州蒙遜寵之號曰聖人曇無讖
以男女交接術教授婦女蒙遜諸女子婦皆往受法太
武聞諸行人言曇無讖術乃召之蒙遜不遣遂發露其
事拷訊殺之至此帝知之於是賜昭儀沮渠氏死誅其
宗族唯萬年及祖以前先降得免是年又人告牧犍猶
與故臣交通謀反詔司徒崔浩就公主第賜牧犍死與

主決良父乃自裁葬以王禮諡曰哀王及公主薨詔與
牧犍合葬公主無男有女以國甥得襲母爵爲武威公
主蒙遜子季義位東雍州刺史真君中與河東薛安都
謀逆召至京師付其兄弟扼殺之萬年祖奩以先降萬
年拜張掖王祖廣武公後坐謀逆俱死初牧犍之敗第
樂都太守安周南奔吐谷渾太武遣鎮南將軍奚眷討
之牧犍弟酒泉太守無諱奔晉昌乃使弋陽公元潔守
酒泉真君初無諱圍酒泉陷之又圍張掖不能尅退保
臨松太武不伐詔諭之時永昌王徼鎮涼州無諱使其
中尉梁偉詣徼求奉酒泉又送潔及統帥兵出於徼軍

二年太武遣使拜無諱爲征西大將軍涼州牧酒泉王
尋以無諱復規叛遣南陽王奚眷討酒泉尅之無諱遂
謀度流沙遣安周西擊鄯善鄯善欲降會魏使者勸令
拒守安周不能尅退保東城三年春鄯善王比龍西奔
且末其世子乃從安周鄯善大亂無諱遂度流沙士卒
渴死者大半仍據鄯善先是高昌太守闕爽爲李寶舅
唐契所攻聞無諱至鄯善使詐降欲令無諱與唐契相
擊留安周住鄯善從焉耆東北趣高昌會蠕蠕殺唐契
爽拒無諱無諱將衛興奴遂屠其城爽奔蠕蠕無諱因
留高昌五年夏無諱病死安周立爲蠕蠕所并

北史卷九十三 齊本紀第三 齊書卷九十三 齊本紀第三
梁帝蕭譽字理孫蘭陵人武帝之孫昭明太子統之弟
三子也幼好學善屬文尤長佛義特爲梁武嘉賞梁會
通中封曲江縣公及昭明太子薨封譽岳陽郡王位東
揚州刺史領會稽太守初昭明卒梁武捨譽兄弟而立
簡文內常愧之故寵亞諸子以會稽人物殷阜一都之
會故有此授以慰其心譽旣以其昆季不得爲嗣常懷
不平又以梁武衰老朝多秕政有敗亡之漸遂蓄聚貨
財交通賓客招募輕俠折節下之其勇敢者多歸附焉
左右遂至數千人皆厚加資給大同元年除西中郎將
雍州刺史都督五州諸軍事寧蠻校尉譽以襄陽形勝

之地又梁武創基之所時平足以樹根本時亂足以圖
霸功遂務脩刑政太清二年梁武以譽兄河東王譽爲
湘州刺史徙湘州刺史張纘爲雍州纘恃才輕譽州府
迎候有闕譽深銜之遂託疾不與相見後聞侯景作亂
頗陵蹙纘纘構譽及譽於梁元帝元帝令其世子方等
及王僧辯相繼攻譽譽告於譽譽聞之大怒及梁元將
援建業令所督諸州並發兵赴都譽遣府司馬劉方貴
領兵爲前軍出漢口及將發梁元又使諮議參軍劉毅
召譽自行譽不從而方貴潛與梁元相知尅期襲譽未
及發會譽以他事召方貴謀泄遂據樊城拒命譽遣軍

攻之梁元乃厚資遣張纘若將述職而密援方貴纘次大隄而樊城已陷晉禽方貴兄弟黨與並斬之晉時以譽危急乃留諮議參軍蔡大寶守襄陽率衆伐江陵以救之梁元大懼乃遣參軍庾夔謂晉曰以姪伐叔逆順安在晉曰家兄無辜屢被攻圍七父若顧先恩豈應若是如能退兵湘水吾便旋旆襄陽時攻柵不尅會大雨暴至平地四尺衆頗離心軍主杜岸弟幼安及其兄子龕以其屬降於江陵晉夜遁歸襄陽器械輜重多沒於漚水晉恐不能自固乃遣蔡大寶求附庸於西魏時西魏大統十年也周文令丞相東閣祭酒榮權使焉是歲梁元令柳仲禮圖襄陽晉乃遣妃王氏及世子燾爲質請救周文令榮權報命仍遣開府楊忠爲援十六年忠禽仲禮平漢東西魏命晉發喪嗣位使假散騎常侍鄭孝穆及榮權策命晉爲梁王乃於襄陽置百官承制封拜十七年留尚書僕射蔡大寶守雍部而朝於京師周文謂曰王之來此頗由榮權乃召權見曰權吉士也寡人與之從事未嘗見失信晉曰榮常道二國之言無私故晉今者得歸誠魏闕耳魏恭帝元年周文命柱國于謹伐江陵晉以兵會之及江陵平周文命晉主梁嗣居江陵東城資以江陵一州之地其襄陽所統盡入於

北史卷之二十三 列傳 三十一
周晉乃稱皇帝於其國年號大定追尊其父統爲昭明
皇帝廟號高宗統妃蔡氏爲昭德皇后又尊其所生母
龔氏皇太后立妻王氏爲皇后子歸爲皇太子其慶賞
刑威官方制度並同王者晉上疏則稱臣奉朝廷正朔
至於爵命其下亦依梁氏之舊其戎章勳級則又兼用
柱國等官又追贈叔父邵陵王綸太宰諡曰壯武贈兄
河東王譽丞相諡曰武桓周文仍置江陵防主統兵居
於西城名曰武植周文外云助晉備禦內實防晉初江
陵滅梁元將王琳據湘州志圖匡復及晉立琳乃遣其
將潘純陀侯方兒來寇晉禦之純陀等退歸夏口晉之

四年晉遣其大將軍王操略取王琳之長沙武陵南平
等郡五年王琳又遣其將雷文柔襲陷監利郡太守大
有死之尋而琳與陳人相持稱蕃乞師於晉晉許之師
未出而琳軍敗附於齊是歲其太子歸來朝京師六年
四月大雨震前殿崩壓一百餘人七年冬有鵬鳥鳴於
寢殿八年二月晉終於前殿時年四十四是歲周保定
二年也八月葬於平陵諡曰宣皇帝廟號中宗晉少有
大志不拘小節雖多猜忌而知人善任使撫將士有恩
能得其死力性不飲酒安於儉素事母以孝聞又不好
聲色尤惡見婦人雖相去數步亦云遙聞其鼻經御婦

人之衣更不著並皆棄之一幸姬媵病臥累旬又惡見人髮白事之者必方便避之擔輿者冬月必須裹頭夏月則加蓮葉帽其在東揚州頗放誕省覽簿領好爲戲弄之言以此獲譏於世及江陵平宿將尹德毅謂登曰臣聞人主之行與匹夫不同匹夫者飾小行競小廉以取名譽人主者定天下安社稷以成大功今魏虜貪恠罔顧弔伐之義俘囚士庶並克軍實然此等戚屬咸在江東悠悠之人可門到戶說旣塗炭至此咸謂殿下爲之殿下旣殺人父兄孤人子弟人盡讎也又誰與爲國但魏之精銳盡萃於此犒師之禮非無故事若殿下爲

設享會固請于謹等爲歡彼無我虞當相率而至預伏武士因而斃之江陵百姓撫而安之文武官僚隨卽銓授魏人懾息未敢送死僧辯之徒折簡可致然後朝服濟江入踐皇極纘堯復禹萬世一時登謂德毅曰卿此策非不善也然魏人待我甚厚未可背德若遽爲卿計則鄧祁侯所謂人將不食吾餘旣而闔城長幼被虜入關又失襄陽之地登恨乃曰不用德毅之言以至於此又見邑居殘毀干戈日用耻其威略不振常懷憂憤乃著愍時賦以見志焉居常怏怏每誦老馬伏櫪志在千里烈士暮年壯心不已未嘗不盱衡抱歎吒者久之遂

以憂憤發背而死晉篤好文義所著文集十五卷內典
華嚴般若法華金光明義疏三十六卷並行於世武帝
又命其太子歸嗣位年號天保

歸字仁遠晉之第三子也機辯有文學善於撫御能得
其下歡心嗣位之元年尊其祖母龔太后曰太皇太后
嫡母王皇后曰皇太后所生曹貴嬪曰皇太妃其年五
月其太皇太后薨諡曰元太后九月其太妃又薨諡曰
孝皇太妃二年其皇太后薨諡曰宣靜皇后五年陳湘
州刺史華皎巴州刺史戴僧朔並來附皎送其子玄響
為質於歸仍請兵伐陳歸上言其狀武帝詔衛公直督

荆州摠管權景宣六將軍元定等赴之歸亦遣其柱國
王操率水軍二萬會皎於巴陵既而與陳將吳明徹等
戰於沌口直軍不利元定遂沒歸大將軍李廣等亦為
陳人所虜長沙巴陵並陷於陳衛公直乃歸舉於歸之
柱國殷亮歸雖以退敗不獨舉亮然不敢違命遂誅之
吳明徹乘勝攻剋歸河東郡獲其守將許孝敬明年明
徹進寇江陵引江水灌城歸出頓紀南以避其銳江陵
副摠管高琳與其尚書僕射王操拒守歸馬軍主馬武
吉徹等擊明徹退保公安歸乃還江陵歸之八年陳又
遣其司空章昭達來寇江陵摠管陸騰及歸之將士擊

走之昭達又寇竟陵之青泥歸令其大將軍許世武赴
援大爲昭達所破初華皎戴僧朔從衛公直與陳人戰
率其麾下數百人歸於歸歸以皎爲司空封江夏郡公
僧朔爲車騎將軍封吳興縣侯歸之十年皎將來朝至
襄陽請衛公直曰梁主旣江南諸郡人少國貧朝廷興
亡繼絕理宜資贍豈使齊桓楚莊獨擅救衛復陳之美
望借數州以禪梁國直然之乃遣使言狀帝許之詔以
基平都三州歸之於歸及平齊歸朝於鄴帝雖以禮接
之然未之重也歸知之後因宴承間乃陳其父荷周文
拯救之恩并叙二國艱虞唇齒倚角之事辭理辯暢因

涕泣交流帝亦爲之歔歔自是大加賞異禮遇日隆後
帝復與之宴齊氏故臣叱列長文亦預焉帝指謂歸曰
是登俾罵朕者也歸曰長文未能輔桀翻敢吠堯帝大
笑及酒酣帝又命琵琶自彈之仍謂歸曰當爲梁主盡
歡歸乃起請舞帝曰王乃能爲朕舞乎歸曰陛下旣親
撫五絃臣敢不下同百獸帝大悅賜雜繒萬段良馬數
十匹并賜齊後主妓妾及帝所乘五百里駿馬以遣之
及隋文帝執政尉遲迥王謙司馬消難等各起兵時歸
將帥皆密請與師與迥等爲連衡之勢進可以盡節於
周氏退可以席卷山南歸以爲不可俄而消難奔陳迥

等相次破滅隋文帝既踐極恩禮彌厚遣使賜金五百兩銀千兩布帛萬匹馬五百匹開皇二年隋文帝備禮納歸女爲晉王妃又欲以其子瑒尚蘭陵公主由是罷江陵總管歸專制其國四年來朝長安帝甚敬待之詔歸位在王公之上歸被服端麗進退閑雅天子矚目百僚傾慕帝賜歸繚萬匹珍玩稱是及還親執其手謂之曰梁主久滯荆楚未復舊都朕當振旅長江相送旋反歸拜謝而歸五年五月寢疾薨臨終上表奉辭并獻所服金裝劍帝覽而嗟悼歸在位二十三年梁之臣子葬之顯陵諡曰孝明皇帝廟號世宗歸孝悌慈仁有君人之量四時祭享未嘗不悲慕流涕性尤儉約御下有方境內安之所著文集及孝經周易義記及大小乘幽微並行於世文帝又命其太子琮嗣位

琮字溫文性倣儻不羈博學有文義兼善弓馬遣人伏地持帖琮奔馬射之十發十中持帖者亦不懼初封東陽王尋立爲梁太子及嗣位帝賜以璽書敦勉之又賜梁之大臣璽書誠勉之時琮年號廣運有識者曰運之爲字軍走也吾君將奔走乎其年琮遣大將軍戚昕以舟師襲陳公安不尅而還文帝徵琮叔父岑入朝拜大將軍封懷義公因留不遣復置江陵總管以監之琮所

北史卷九十三 齊 三十一
署大將軍許世武密以城召陳將宜黃侯陳紀謀泄琮
誅之後二歲上徵琮入朝率臣下二百餘人朝京師江
陵父老莫不殞涕曰吾君其不反矣上以琮來朝遣武
鄉公崔弘度將兵戍之軍至都州琮叔父巖及弟瓛等
懼弘度掩襲之遂引陳人至城下虜居人而叛於是廢
梁國上遣左僕射高熲安集之曲赦江陵死辜給復十
年梁二主各給守墓十戶拜琮柱國賜爵莒國公自登
初卽位歲在乙亥至歲在丁未凡三十三載而亡琮至
煬帝嗣位甚見親重拜內史令改封梁公琮之宗族總
麻以上金隨才擢用於是諸蕭昆弟布列朝廷琮性澹

雅不以職務自嬰退朝縱酒而已內史令楊約與琮同
列帝令約宣旨誡勵約復以私情諭之琮曰琮若復事
事則何異公哉約笑而退約兄素時爲尚書令見琮嫁
從父妹於鉗耳氏謂曰公帝王之族何乃適妹鉗耳氏
琮曰前已嫁妹於侯莫陳氏此復何疑素曰鉗耳羌也
侯莫陳虜也何得相比琮曰以羌異虜未之前聞素慙
而止琮雖羈旅見北間豪貴無所降下常與賀若弼深
友旣誅復有童謠曰蕭蕭亦復起帝由是忌之遂廢於
家卒贈左光祿大夫子鉉位襄城通守復以琮弟子鉅
爲梁公鉅小名曰藏煬帝甚昵之以爲千牛與宇文暹

出入宮掖伺察內外帝每有遊宴鉅未嘗不從遂於宮中多行淫穢江都之變爲宇文化及所殺晉之居帝位百僚追諡孝惠太子巖封安平王岌封東平王岑封河間王後改封吳郡王琮弟巖義興王瑒晉陵王瑒臨海王珣南海王瑒義安王以蔡大寶爲股肱王操爲腹心魏益德尹正薛暉許孝敬薛宣爲爪牙甄玄成劉盈岑善方傳淮褚珪蔡大業典衆務張綰以舊齒處顯位沈重以儒學蒙厚禮自餘多所獎拔咸盡其器能及歸纂業親賢並用將相則華皎殷亮劉忠義宗室則蕭欣蕭翼人望則蕭確謝溫柳洋王湜徐岳外戚則王洋王誦

殷璉文章則劉孝勝范迪沈居游君公柳信言政事則袁敞柳莊蔡延壽甄翊皇甫茲故能保其疆土而和其民人焉今載晉子蔡等及蔡大寶以下尤著者附於左其在梁陳隋已有傳及歸諸子未任職者則不兼錄蔡字道遠晉之長子也母曰宣靜皇后晉之爲梁王立爲世子尋病卒及晉稱帝追諡焉

巖字義遠晉第五子也性仁厚善撫接歷尚書令太尉太傅入陳授東陽州刺史及陳亡百姓推巖爲主爲摠管宇文述所破伏法於長安

岌晉第六子也性淳和位至侍中中衛將軍巖之五年

卒贈司空諡曰孝

岑字智遠晉第八子也位至太尉性簡貴御下嚴整及
綜嗣位自以望重屬尊頗有不法故隋文徵入朝拜大
將軍封懷義郡公

獻字欽文歸第二子也幼有令譽能屬文位荊州刺史
頗有能名崔弘度兵至荊州獻懼與其叔父巖奔陳陳
主以爲侍中吳州刺史甚得物情三吳父老皆曰吾君
之子陳亡吳人推之爲主吳人見梁武簡文及晉歸等
兄弟中並第三而踐尊位獻自以歸第三子深自矜負
有謝異者頗知廢興梁陳之際言無不驗江南人甚敬

信之及陳主被禽異奔獻由是益爲衆所歸宇文述之
討獻遣王褒守吳州自將拒述述遣兵別道襲褒褒衣
道士服棄城而遁獻敗將左右數人逃於太湖匿於人
家被執述送長安斬之璟仕隋尚衣奉御瑒衛尉卿秘
書監陶丘侯瑀內史侍郎河池太守

蔡大寶字敬位濟陽考城人祖履齊尚書祠部郎父點
梁尚書儀曹郎南充州別駕大寶少孤而篤學不倦善
屬文初以明經對策第一解褐武陵王國左常侍嘗以
書干僕射徐勉勉大賞異乃令與其子遊處所有墳籍
盡以給之遂博覽羣書學無不綜晉初出第勉仍薦大

北史卷九十三 列傳 三十一
寶爲侍讀兼掌記室尋除尚書儀曹郎登出鎮會稽大
寶詰選曹求諮議不得以爲記室大寶攘臂而出曰不
爲孫秀非人也登蒞襄陽遷諮議參軍謀謨皆自大寶
出及梁元與河東王譽結隙登令大寶使江陵以觀之
梁元素知大寶見之甚悅乃示所制玄覽賦令注解焉
三日而畢梁元大嗟賞之贈遺甚厚大寶還白登云湘
東必有異圖禍亂將作不可下援臺城登納之及登於
江陵稱帝爲侍中尚書令參掌選事進位柱國軍師將
軍封安豐縣侯歸嗣位冊授司空中書監中權大將軍
領吏部尚書固讓司空許之加特進歸之二年卒及葬

歸三臨其喪贈司徒進爵爲公諡曰文凱配食登廟大
寶性嚴整有智謀雅達政事文辭贈速登之章表書記
教令詔冊並大寶專掌之登推心委任以爲謀主時人
以登之有大寶猶劉先主之有孔明焉所著文集三十
卷及尚書義疏並行於世有四子次子延壽有器識博
涉經籍尤善當世之務尚登女宣城公主歷中書郎尚
書右丞吏部郎御史中丞從琮入隋授開府儀同三司
祕書丞終於成州刺史大寶弟大業字敬道有至行位
散騎常侍衛尉卿都官尚書太常卿卒贈金紫光祿大
夫諡曰簡有三子允恭最知名位太子舍人梁滅入陳

爲尚書庫部郎陳亡仕隋起居舍人

王操字子高其先太原晉陽人營母龔氏之外余也性敦厚有籌略初爲營外兵參軍親任亞於蔡大寶及營稱帝歷五兵尚書郢州刺史進位柱國封新康縣侯歸嗣位授鎮右將軍尚書僕射及吳明徹爲寇歸出頓紀南操撫循將士莫不用命明徹既退江陵獲全操之力也遷侍中中衛將軍尚書令開府儀同三司領荊州刺史操既位居朝右每自挹損深得當時之譽卒歸舉哀於朝堂流涕曰天不使吾平蕩江表何奪吾賢相之速也及葬親祖於瓦官門贈司空進爵爲公諡曰康節有

七子次子衡最知名有才學位中書黃門侍郎

魏益德襄陽人也有材幹膽勇過人營稱帝進位柱國封上黃縣侯卒贈司空諡曰忠壯進爵爲公歸之五年以益德配食營廟

尹正其先天水人營蒞雍州正爲其府中兵參軍龔張纘獲杜岸皆正之力營稱帝除護軍將軍位柱國封新野縣侯卒贈開府儀同三司諡曰剛歸之五年以正配食營廟子德毅多權略位大將軍後以見疑賜死

甄玄成字敬平中山人博達經史善屬文少爲簡文所知以錄事參軍隨營鎮襄陽轉中記室參軍願參政事

以江陵甲兵殷盛遂懷貳心密書與元帝具申誠款或有得其書送於公公深信佛法常願不殺誦法華經人玄成素誦法華經遂以此獲免嘗後見之常曰甄公好得法華經力後位吏部尚書有文集二十卷子詔少沈歛閑習政事歷中書舍人尚書右丞從琮入隋授開府儀同三司終於太府少卿

岑善方字恩義南陽棘陽人祖惠南給事申父昶散騎侍郎善方有器局博綜經史以刑獄參軍隨嘗至襄陽嘗初請內附以善方兼記室克使往來凡數十反魏恭帝二年封長寧縣公及嘗稱帝位散騎侍郎起部尚書

善方性清慎有當世幹能故嘗委以機密卒贈太常卿諡曰敬所著文集十卷有七子並有操行之元之利之象最知名之元太子舍人早卒之利仕隋位零陵郡丞之象仕隋尚書虞部員外侍郎邵陵上宜渭南邯鄲四縣令

宗如周南陽人有才學以府僚隨嘗後至度支尚書如周面狹長嘗以法華經云聞經隨喜面不狹長嘗戲之曰卿何為謗經如周踧踏自陳不謗嘗又謂之如初如周懼出告蔡大寶大寶知其言笑謂之曰君當不謗餘經正應不信法華耳如周乃悟又嘗有人訴事於如周

謂爲經作如州官也乃曰某有屈滯故來訴如州官如
周曰余何小人敢呼我名其人慙謝曰祇言如周官作
如州不知如州官名如周早知如州官名如周則不敢
喚如周官作如州如周乃笑曰令卿自責見侮反深衆
咸服其寬雅

袁敞陳郡人祖昂司空父仕俊安成內史敞少有識量
博涉文史以吏部郎使詣周時主者以敞班在陳使之
後敞固不從命曰昔陳之祖父乃梁諸侯下吏盜有江
東今周朝宗萬國招攜以利若使梁之行人陳之後
便恐彝倫失序豈使臣之所望焉主者不能屈遂以狀

奏周武帝善之乃詔敞與陳使異日而進使還以稱旨
遷侍中轉左戶尚書從琮入隋授開府儀同三司終於
譙州刺史

論曰自金行運否中原喪亂元氏唯天所命方一函夏
鐵弗徒何之輩雖非行錄所歸觀其遽爲割據亦一時
之傑然而卒至夷滅可謂魏之驅除梁主任術好謀愛
賢養士蓋有英雄之志霸王之略焉及淮海版蕩骨肉
猜貳擁衆自固稱藩內款終能據有全楚中興頽運雖
土宇殊於舊邦而位號同於曩日貽厥自遠享國雖短
可不謂賢哉嗣子纂業增修遺構賞罰得衷舉厝有方

密邇寇讎則威略具舉朝宗上國則聲猷遠振豈非繼
世之令主乎琮大去其邦因而不反遂爲外戚不事自
持蓋亦守滿之道也

北史卷九十三終

北史卷九十四

列傳第八十二

高麗

百濟

新羅

勿吉

奚

契丹

室韋

豆莫婁

地豆干

烏洛侯

流求

倭

蓋天地之所覆載至大日月之所照臨至廣萬物之內
生靈寡而禽獸多兩儀之間中土局而殊俗曠人寓形
天地稟氣陰陽愚智本於自然剛柔繫於水土故霜露

所會風氣所通九川爲紀五岳作鎮此之謂諸夏生其地者則仁義所出昧谷嶠夷孤竹北戶限以丹徼紫塞隔以滄海交河此之謂荒裔感其氣者則凶德行稟若夫九夷八狄種落繁熾七戎六蠻充牣邊鄙雖風土殊俗嗜慾不同至於貪而無厭狼而好亂強則旅拒弱則稽服其揆一也秦皇鞭笞天下躡武於遐方漢武士馬強盛肆志於遠略匈奴已却其國乃虛天馬旣來其人亦困是知鴈海龍堆天所以紀夷夏也炎方朔漠地所以限內外也況乎時非秦漢志甚嬴劉逆天道以求其功殫人力而從所欲顛墜之景固不旋踵是以先王設教內諸夏而外夷狄往哲垂範美樹德而鄙廣地雖禹迹之東漸西被不過海及流沙王制之自北徂南裁猶穴居交趾豈非道貫三古義高百代者乎自魏至隋市朝屢章其四夷朝享亦各因時今各編次備四夷傳云高句麗其先出夫餘王嘗得河伯女因閉於室內爲日所照引身避之日影又逐旣而有孕生一卵大如五升夫餘王棄之與犬犬不食與豕豕不食棄於路牛馬避之棄於野衆鳥以毛茹之王剖之不能破遂還其母母以物裹置暖處有一男破而出及長字之曰朱蒙其俗言朱蒙者善射也夫餘人以朱蒙非人所生請除之王

不聽命之養焉朱蒙私試知有善惡駿者減食令瘦駕
者善養令肥夫餘王以肥者自乘以瘦者給朱蒙後狩
于田以朱蒙善射給之一矢朱蒙雖一矢殪獸甚多夫
餘之臣又謀殺之其母以告朱蒙朱蒙乃與馬遼等二
人東南走中道遇一大水欲濟無梁夫餘人追之甚急
朱蒙告水曰我是日子河伯外孫今追兵垂及如何得
濟於是魚鼈爲之成橋朱蒙得度魚鼈乃解追騎不度
朱蒙遂至普述水遇見三人一著麻衣一著納衣一著
水藻衣與朱蒙至紇升骨城遂居焉號曰高句麗因以
高爲氏其在夫餘妻懷孕朱蒙逃後生子始閭諧及長
知朱蒙爲國王卽與母亡歸之名曰閭達委之國事朱
蒙死子如栗立如栗死子莫來立乃并夫餘漢武帝元
封四年滅朝鮮置玄菟郡以高句麗爲縣以屬之漢昭
賜衣幘朝服鼓吹常從玄菟郡受之後稍驕不復詣郡
但於東界築小城受之遂名此城爲幘溝淒溝淒者句
麗城名也王莽初發高句麗兵以伐胡而不欲行莽強
迫遣之皆出塞爲寇盜州郡歸咎於句麗侯驪嚴尤誘
而斬之莽大悅更名高句麗高句麗侯光武建武八年
高句麗遣使朝貢朝貢至殤安之間莫來裔孫宮數寇
遼東玄菟太守蔡風討之不能禁宮死子伯固立順和

之間復數犯遼東寇抄靈帝建寧二年玄菟太守耿臨
討之斬首虜數百級伯固乃降屬遼東公孫度之雄海
東也伯固與之通好伯固死子伊夷模立伊夷模自伯
固時已數寇遼東又受亡胡五百餘戶建安中公孫康
出軍擊之破其國焚燒邑落降胡亦叛伊夷模更作新
國其後伊夷模復擊玄菟玄菟與遼東合擊大破之伊
夷模死子位宮立始位宮曾祖宮生而目開能視國人
惡之及長凶虐國以殘破及位宮亦生而視人高麗呼
相似爲位以爲似其曾祖宮故名位宮位宮亦有勇力
便鞍馬善射獵魏景初二年遣太傅司馬宣王率衆討

公孫文懿位宮遣主簿大加將數千人助軍正始三年
位宮寇遼西安平五年幽州刺史母丘儉將萬人出玄
菟討位宮大戰于沸流敗走儉追至靺嶼懸車東馬登
丸都山屠其所都位宮單將妻息遠竄六年儉復討之
位宮輕將諸加奔沃沮儉使將軍王頴追之絕沃沮于
餘里到肅慎南刻石紀功又刊丸都山銘不耐城而還
其後復通中夏晉永嘉之亂鮮卑慕容廆據昌黎大棘
城尤年授北平州刺史位宮玄孫乙弗利頻寇遼東廆
不能制弗利死子釗代立魏建國四年慕容廆子晃伐
之入自南陝戰于木底大破釗軍追至丸都釗單馬奔

寘晃掘釗父墓掠其母妻珍寶男女五萬餘口焚其室
 毀丸都城而還釗後為百濟所殺及晉孝武太元十年
 句麗攻遼東玄菟郡後燕慕容垂遣其弟農伐句麗復
 二郡垂子寶以句麗王安為平州牧封遼東帶方二國
 王始置長史司馬參軍官後略有遼東郡太武時釗曾
 孫璉始遣使者詣安東奉表貢方物并請國諱大武嘉
 其誠欵詔下帝系名諱於其國使員外散騎侍郎李敖
 拜璉為都督遼海諸軍事征東將軍領東夷中郎將遼
 東郡公高句麗王敖至其所居平壤城訪其方事云去
 遼東南一千餘里至柵城南至小海北至舊夫餘人戶
 參倍於前魏時後貢使相尋歲致黃金二百斤白銀四
 百斤時馮弘率眾奔之太武遣散騎常侍封撥詔璉令
 送弘璉上書稱當與弘俱奉王化竟不遣太武怒將往
 討之樂平王丕等議待後舉太武乃止而弘亦尋為璉
 所殺後文明太后以獻文六宮未備敕璉令薦其女璉
 奉表云女已出求以弟女應旨朝廷許焉乃遣安樂王
 真尚書李敷等至境送幣璉惑其左右之說云朝廷昔
 與馮氏婚姻未幾而滅其國殷鑒不遠宜以方便辭之
 璉遂上書妄稱女死朝廷疑其矯拒又遣假散騎常侍
 程駿切責之若女審死聽更選宗淑璉云若天子恕其

前愆謹當奉詔會獻文崩乃止至孝文時璉貢獻倍前
其報賜亦稍加焉時光州於海中得璉遣詣齊使餘奴
等送闕孝文詔責曰道成親殺其君竊號江左朕方欲
興滅國於舊邦繼絕世於劉氏而卿越境外鄉交通篡
賊豈是藩臣守節之義今不以一過掩舊款卽送還藩
其感恕思愆祇承明憲輯寧所部動靜以聞太和十五
年璉死年百餘歲孝文舉哀於東郊遣謁者僕射李安
上策贈車騎大將軍太傅遼東郡公高句麗王諡曰康
又遣大鴻臚拜璉孫雲使持節都督遼海諸軍事征東
將軍領護東夷中郎將遼東郡公高句麗王賜衣冠服
物車旗之飾又詔雲遣世子入朝令及郊丘之禮雲上
書辭疾遣其從叔升于隨使詣闕嚴責之自此歲常貢
獻正始中宣武於東堂引見其使芮悉弗進曰高麗係
誠天極累葉純誠地產土毛無愆王貢但黃金出夫餘
珂則涉羅所產今夫餘爲勿吉所逐涉羅爲百濟所并
國王臣雲惟繼絕之義悉遷于境內二品所以不登王
府實兩賊之爲宣武曰高麗世荷上將專制海外九夷
黠虜實得征之昔方貢之愆責在連率宜宣朕旨於卿
主務盡威懷之略使二邑還復舊墟土毛無失常貢也
神龜中雲死靈太后爲舉哀於東堂遣使策贈車騎大

將軍領護東夷校尉遼東郡公高麗王又拜其世子安
爲鎮東將軍領護東夷校尉遼東郡公高麗王正光初
光州又於海中執得梁所授安寧東將軍衣冠劍珮及
使人江法盛等送京師安死子延立孝武帝初詔加延
使持節散騎常侍車騎大將軍領護東夷校尉遼東郡
公高句麗王天平中詔加延侍中車騎大將軍餘悉如
故延死子成立訖於武定已來其貢使無歲不至大統
十二年遣使至西魏朝貢及齊受東魏禪之歲遣使朝
貢于齊齊文宣加成使持節侍中驃騎大將軍領東夷
校尉遼東郡公高麗王如故天保三年文宣至營州使
博陵崔柳使于高麗求魏末流人敕柳曰若不從者以
便宜從事及至不見許柳張目叱之拳擊成墜於牀下
成左右雀息不敢動乃謝服柳以五千戶反命成死子
湯立乾明元年齊廢帝以湯爲使持節領東夷校尉遼
東郡公高麗王周建德六年湯遣使至周武帝以湯爲
上開府儀同大將軍遼東郡公遼東王隋文帝受禪湯
遣使詣闕進授大將軍改封高麗王自是歲遣使朝貢
不絕其國東至新羅西度遼二千里南接百濟北隣靺
鞨一千餘里人皆土着隨山谷而居衣布帛及皮土田
薄瘠蠶農不足以自供故其人節飲食其王好脩宮室

都平壤城亦曰長安城東六里隨山屈曲南臨浪水城
內唯積倉儲器備寇賊至日方入固守王別爲宅於其
側不常居之其外復有國內城及漢城亦別都也其國
中呼爲三京復有遼東玄菟等數十城皆置官司以統
攝與新羅每相侵奪戰爭不息官有大對盧太兄大
兄小兄竟侯奢烏拙太大使者大使者小使者禱奢醫
屬仙人凡十二等分掌內外事其大對盧則以強弱相
陵奪而自爲之不由王署置復有內評五部禱薩人皆
頭着折風形如弁士人加插二鳥羽貴者其冠曰蘇骨
多用紫羅爲之飾以金銀服大袖衫大口袴素皮帶黃
革履婦人裙襦加襪書有五經三史三國志晉陽秋兵
器與中國略同及春秋校獵王親臨之稅布五疋穀五
石游人則三年一稅十人共細布一疋租戶一石次七
斗下五斗其刑法叛及謀逆者縛之柱藝而斬之籍沒
其家盜則償十倍若貧不能償者樂及公私債負皆聽
評其子女爲奴婢以償之用刑旣峻罕有犯者樂有五
絃琴箏篳篥橫吹簫鼓之屬吹蘆以和曲每年初聚戲
浪水上王乘轡輦列羽儀觀之事畢王以衣入水分爲
左右二部以水石相濺擲誼呼馳逐再三而止俗潔淨
自喜尚容止以趨走爲敬拜則曳一脚立多反拱行必

挿手性多詭伏言辭鄙穢不簡親踈父子同川而浴共室而寢好歌舞常以十月祭天其公會衣服皆錦繡金銀以爲飾好蹲踞食用俎杌出三尺馬云本朱蒙所乘馬種卽果下也風俗尚淫不以爲愧俗多游女夫無常入夜則男女羣聚而戲無有貴賤之節有婚嫁取男女相悅卽爲之男家送猪酒而已無財聘之禮或有受財者人共耻之以爲賣婢死者殯在屋內經三年擇吉日而葬居父母及夫喪服皆三年兄弟三月初終哭泣葬則鼓舞作樂以送之埋訖取死者生時服玩車馬置墓側會葬者爭取而去信佛法敬鬼神多淫祠有神廟二所一曰夫餘神刻木作婦人像一曰高登神云是其始祖夫餘神之子並置官司遣人守護蓋河伯女朱蒙云及隋平陳後湯大懼陳兵積穀爲守拒之策開皇十七年上賜璽書責以每遣使人歲常朝貢雖稱藩附誠節未盡驅逼韎鞞禁固契丹昔年潛行貨利招動羣小私將弩手巡竄下國豈非意欲不滅故爲竊盜坐使空館嚴加防守又數遣馬騎殺害邊人恒自猜疑密覘消息懇勸曉示許其自新湯得書惶恐將表陳謝會病卒子元嗣文帝使拜元爲上開府儀同三司襲爵遼東公賜服一襲元奉表謝恩并賀祥瑞因請封王文帝優冊爲

王明年率靺鞨萬餘騎寇遼西營州總管韋世沖擊走之帝大怒命漢王諒爲元帥總水陸討之下詔黜其爵位時餽運不繼六軍乏食師出臨渝關復遇疾疫王師不振及次遼水元亦惶懼遣使謝罪上表稱遼東糞土臣元云云上於是罷兵待之如初元亦歲遣朝貢煬帝嗣位天下全盛高昌王突厥啟人可汗並親詣闕貢獻於是徵元入朝元懼蕃禮頗闕大業七年帝將討元罪車駕度遼水止營於遼東地分道出師各頓兵於其城下高麗出戰多不利皆嬰城固守帝令諸軍攻之又敕諸將高麗若降卽宜撫之不得縱兵入城陷賊輒言諸將奉旨不敢赴機先馳奏比報賊守禦亦備復出拒戰如此者三帝不悟由是食盡師老轉輸不繼諸軍多敗績於是班師是行也唯於遼水西拔賊武厲邏置遼東郡及通定鎮而還九年帝復親征敕諸軍以便宜從事諸將分道攻城賊勢日蹙會楊玄感作亂帝大懼卽日六軍並還兵部侍郎斛斯政亡入高麗高麗具知事實盡銳來追殿軍多敗十年又發天下兵會盜賊蜂起所在阻絕軍多失期至遼水高麗亦因弊遣使乞降因送斛斯政贖罪帝許之頓懷遠鎮受其降仍以俘囚軍實歸至京師以高麗使親告太廟因拘留之仍徵元入朝

元竟不至帝更圖後舉會天下喪亂遂不復行

百濟之國蓋馬韓之屬也出自索離國其王出行其侍兒於後姪娠王還欲殺之侍兒曰前見天上有氣如大雞子來降感故有娠王捨之後生男王置之豕牢豕以口氣噓之不死後徙於馬闌亦如之王以爲神命養之名曰東明及長善射王忌其猛復欲殺之東明乃奔走南至淹滯水以弓擊水魚鼈皆爲橋東明乘之得度至夫餘而王焉東明之後有仇台篤於仁信始立國於帶方故地漢遼東太守公孫度以女妻之遂爲東夷強國初以百家濟因號百濟其國東極新羅句麗西南俱限

大海處小海南東西四百五十里南北九百餘里其都曰居拔城亦曰固麻城其外更有五方中方曰古沙城東方曰得安城南方曰义知下城西方曰刀先城北方曰熊津城王姓餘氏號於羅暇百姓呼爲韃吉支夏言並王也王妻號於陸夏言妃也官有十六品左平五人一品達率三十人二品恩率三品德率四品杆率五品柰率六品已上冠飾銀華將德七品紫帶施德八品皂帶固德九品赤帶季德十品青帶對德十一品文督十二品皆黃帶武督十三品佐軍十四品振武十五品剋虞十六品皆白帶自恩率以下官無常員各有部司分

掌衆務內官有前內部穀內部內掠部外掠部馬部刀部功德部藥部木部法部後宮部外官有司軍部司徒部司空部司寇部點口部客部外舍部網部日宮部市部長吏三年一交代都下有方分爲五部曰上部前部中部下部後部部有五卷土庶居馬部統兵五百人五方各有方領一人以達率爲之方佐貳之方有十郡郡有將三人以德率爲之統兵一千二百人以下七百人以上城之內外庶及餘小城咸分隸焉其人雜有新羅高麗倭等亦有中國人其飲食衣服與高麗略同若朝拜祭祀其冠兩廂加翅戎事則不拜謁之禮以兩手據地爲禮婦人不加粉黛女辮髮垂後已出嫁則分爲兩道盤於頭上衣似袍而袖微大兵有弓箭刀稍俗重騎射兼愛墳史而秀異者頗解屬文能吏事又知醫藥著龜與相術陰陽五行法有僧尼多寺塔而無道士有鼓角笙篪箏竽篳篥之樂投壺擲蒲弄珠握槊等雜戲尤尚奕棊行宋元嘉歷以建寅月爲歲首賦稅以布絹絲麻及米等量歲豐儉差等輸之其刑罰反叛退軍及殺人者斬盜者流其贓兩倍徵之婦犯姦沒入夫家爲婢婚娶之禮略同華俗父母及夫死者三年居服餘親則葬訖除之上田濕氣候溫暖人皆山居有巨栗其五穀

雜果菜蔬及酒醴肴饌之屬多同於內地唯無駝騾驢
羊鷓鴣等國中大姓有族沙氏燕氏芻氏解氏真氏國
氏木氏苗氏其王每以四仲月祭天及五帝之神立其
始祖仇台之廟於國城歲四祠之國西南人島居者十
五所皆有城邑魏延興二年其王餘慶始遣其冠軍將
軍駙馬都尉弗斯侯長史餘禮龍驤將軍帶方太守司
馬張茂等上表自通云臣與高麗源出夫餘先世之時
篤崇舊欵其祖釗輕廢隣好陵踐臣境臣祖須整旅電
邁梟斬釗首自爾以來莫敢南顧自馮氏數終餘盡奔
復醜類漸盛遂見陵逼構怨連禍三十餘載若天慈曲
矜遠及無外遠遣一將來救臣國當奉送鄙女執掃後
宮并遣子弟牧園外廐尺壤疋夫不敢自有去庚辰年
後臣西界海中見尸十餘并得衣器鞍勒看之非高麗
之物後聞乃是王人來降臣國長蛇隔路以阻于海今
上所得鞍一以爲實矯獻文以其僻遠冒險人獻禮遇
優厚遣使者邵安與其使俱還詔曰得表聞之無恙卿
與高麗不睦致被陵犯苟能順義守之以仁亦何憂於
寇讎也前所遣使浮海以撫荒外之國從來積年往而
不反存亡達否未能審悉卿所送鞍比較舊乘非中國
之物不可以疑似之事以生必然之過經略權要已具

別旨又詔曰高麗稱藩先朝供職日久於彼雖有自昔之釁於國未有犯令之愆卿使命始通便求致伐尋討事會理亦未周所獻錦布海物雖不悉達明卿至心今賜雜物如別又詔璉護送安等至高麗璉稱昔與餘慶有讎不令東過安等於是皆還乃下詔切責之五年使安等從東萊浮海賜餘慶璉書褒其誠節安等至海濱遇風飄蕩竟不達而還自晉宋齊梁據江左右亦遣使稱藩兼受拜封亦與魏不絕及齊受東魏禪其王隆亦通使焉淹死子餘昌亦通使命於齊武平元年齊後主以餘昌爲使持節侍中車騎大將軍帶方郡公百濟王如故二年又以餘昌爲持節都督東靑州諸軍事東靑州刺史周建德六年齊滅餘昌始遣使通周宣政元年又遣使來獻隋開皇初餘昌又遣使貢方物拜上開府帶方郡公百濟王平陳之歲戰船漂至海東耽牟羅國其船得還經于百濟昌資送之甚厚并遣使奉表賀平陳文帝善之下詔曰彼國懸隔來往至難自今以後不須年別人貢使者舞蹈而去八年餘昌使其長史王辯那來獻方物屬興遼東之役遣奉表請爲軍導帝下詔厚其使而遣之高麗頗知其事兵侵其境餘昌死子餘璋立大業三年餘璋遣使燕文進朝貢其年又遣使王

孝隣人獻請討高麗煬帝許之命規高麗動靜然餘璋
內與高麗通和挾詐以窺中國七年帝親征高麗餘璋
使其臣國智牟來請軍期帝大悅厚加賞賜遣尚書起
部郎帝律詣百濟與相知明年六軍度遼餘璋亦嚴兵
於境聲言助軍實持兩端尋與新羅有隙每相戰爭十
年復遣使朝貢後天下亂使命遂絕其南海行三月有
耽牟羅國南北千餘里東西數百里土多麋鹿附庸於
百濟西行三日至貊國千餘里云

新羅者其先本辰韓種也地在高麗東南居漢時樂浪
地辰韓亦曰秦韓相傳言秦世亡人避役來適馬韓割
其東界居之以秦人故名之曰秦韓其言語名物有似
中國人名國為邦弓為弧賊為寇行酒為行觴相呼皆
為徒不與馬韓同又辰韓王常用馬韓人作之世世相
傳辰韓不得自立王明其流移之人故也恒為馬韓所
制辰韓之始有六國稍分為十二新羅則其一也或稱
魏將毋兵儉討高麗破之奔沃沮其後復歸故國有留
者遂為新羅亦曰斯盧其人辯有華夏高麗百濟之屬
兼有沃沮不耐韓穢之地其王本百濟人自海逃入新
羅遂王其國初附庸于百濟百濟征高麗不堪戎役後
相率歸之遂致強盛因襲百濟附庸於迦羅國焉傳世

三十至真平以隋開皇十四年遣使貢方物文帝拜真平上開府樂浪郡公新羅王其官有十七等一曰伊罰干貴如相國次伊尺干次迎干次破彌干次大阿尺干次阿尺干次乙吉干次沙咄干次及伏干次大奈摩干次奈摩次大舍次小舍次吉士次大烏次小烏次造位外有郡縣其文字甲兵同於中國選人壯健者悉入軍烽戍邏俱有屯管部伍風俗刑政衣服略與高麗百濟同每月旦相賀王設宴會班賚羣官六日拜日月神主八月十五日設樂令官人射賞以馬其有大事則聚官詳議定之服色尚畫素婦人辮髮髻頸以雜絲及珠爲飾婚嫁禮唯酒食而已輕重隨貧富新婦之夕女先拜舅姑次卽拜大兄夫死有棺斂葬送起墳陵王及父母妻子喪居服一年田甚良沃水陸兼種其五穀果菜鳥獸物產略與華同大業以來歲遣朝貢新羅地多山險雖與百濟構隙百濟亦不能圖之也

勿吉國在高句麗北一曰靺鞨邑落各自有長不相總一其人勁悍於東夷最强言語獨異常輕豆莫婁等國諸國亦患之去洛陽五千里自和龍北二百餘里有善玉山山北行十三日至祁黎山又北行七日至洛環水水廣里餘又北行十五日至太岳魯水又東北行十八

日如其國國有大水闊三里餘名速未水其部類凡有
七種其一號栗末部與高麗接勝兵數千多驍武每寇
高麗其二伯咄部在栗末北勝兵七千其三安車骨部
在伯咄東北其四拂涅部在伯咄東其五號室部在拂
涅東其六黑水部在安車西北其七白山部在栗末東
南勝兵並不過三千而黑水部尤爲勁自拂涅以東矢
皆石鏃卽古肅慎氏也東夷中爲強國所居多依山水
渠帥曰大莫弗瞞咄國南有從太山者華言太皇俗甚
敬畏之人不得山上洩汗行經山者以物盛去上有熊
羆豺狼皆不害人人亦不敢殺地卑濕築土如堤鑿穴
以居開口向上以梯出入其國無牛有馬車則步推相
與偶耕土多粟麥稌菜則有葵水氣鹹生鹽於木皮之
上亦有鹽池其畜多猪無羊嚼米爲酒飲之亦醉婚嫁
婦人服布裙男子衣猪皮裘頭插武豹尾俗以溺洗手
面於諸夷最爲不潔初婚之夕男就女家執女乳而妬
罷其妻外淫人有告其夫夫輒殺妻而後悔必殺告者
由是姦淫事終不發人皆善射以射獵爲業角弓長
尺箭長尺二寸常以七八月造毒藥傳矢以射禽獸中
者立死資毒藥氣亦能殺人其父母春夏死立埋之家
上作屋令不雨濕若秋冬死以其尸捕貂貂食其肉多

得之延興中遣乙力支朝獻太和初又貢馬五百匹乙力支稱初發其國乘船溯難河西上至太汾河沈船於水南出陸行度洛孤水從契丹西界達和龍自云其國先破高句麗十落密共百濟謀從水道并力取高麗遣乙力支奉使大國謀其可否詔敕三國同是藩附宜其和順勿相侵擾乙力支乃還從其來道取得本船沉達其國九年復遣使侯尼支朝明年復入貢其傍有大莫盧國覆鍾國莫多回國庫婁國素和國具弗伏國匹黎亦國拔大何國郁羽陵國庫伏真國魯婁國羽真侯國前後各遣使朝獻太和十三年勿吉復遣使貢楛矢方物於京師七年又遣使人婆非等五百餘人朝貢景明四年復遣使侯力歸朝貢自此迄于正光貢使相尋爾後中國紛擾頗或不至延興二年六月遣石文云等貢方物以至于齊朝貢不絕隋開皇初相率遣使貢獻文帝詔其使曰朕聞彼土人勇今來實副朕懷視爾等如子爾宜敬朕如父對曰臣等僻處一方聞內國有聖人故來朝拜既親奉聖顏願長爲奴僕其國西北與契丹接每相劫掠後因其使來文帝誠之使勿相攻擊使者謝罪文帝因厚勞之令宴飲於前使者與其徒皆起舞曲折多戰鬪容上顧謂侍臣曰天地間乃有此物常作

用兵意然其國與隋懸隔唯栗末白山爲近煬帝初與高麗戰頻敗其衆渠帥突地稽率其部降拜右光祿大夫居之柳城與邊人來往悅中國風俗請被冠帶帝嘉之賜以錦綺而褒寵之及遼東之役突地稽率其徒以從每有戰功賞賜甚厚十三年從幸江都尋放還柳城李密遣兵邀之僅而得免至高陽沒於王須拔未幾遁歸羅藝

奚本曰庫莫奚其先東部胡宇文之別種也初爲慕容晃所破遺落者竄匿松漠之間俗甚不潔淨而善射獵好爲寇抄登國三年道武親自出討至弱水南大破之獲其馬牛羊豕十餘萬帝曰此羣狄諸種不識德義鼠竊狗盜何足爲患今中州大亂吾先平之然後張其威懷則無所不服矣旣而車駕南遷十數年間諸種與庫莫奚亦皆滋盛及開遼海置戍和龍諸夷震懼各獻方物文成獻文之世庫莫奚歲致名馬文皮孝文初遣使朝貢太和四年輒入塞內辭以畏地豆干抄掠詔書切責之二十年入寇安州時營燕幽三州兵數千人擊走之後復款附每求入塞交易宣武詔曰庫莫奚去太和二十一年以前與安營二州邊人參居交易往來並無欺貳至二十二年叛逆以來遂爾遠竄今雖款附猶在

塞表每請入塞與百姓交易若抑而不許乖其歸向之心信而不慮或有萬一之警交市之日州遣士監之自此已後歲常朝獻至武定已來不絕齊受魏禪歲時來朝其後種類漸多分爲五部一曰辱紇主二曰莫賀弗三曰契箇四曰木昆五曰室得每部一千人爲其帥隨逐水草頗同突厥有阿會氏五部中最盛諸部皆歸之每與契丹相攻擊虜獲財畜因遣使貢方物

契丹國在庫莫奚東與庫莫奚異種同類並爲慕容晃所破俱竄於松漠之間登國中魏大破之遂逃遂與庫莫奚分住經數十年稍滋蔓有部落於和龍之北數百里爲寇盜真君以來歲貢名馬獻文時使莫弗紇何辰來獻得班饗於諸國之末歸而相謂言國家之美心皆忻慕於是東北羣狄聞之莫不思服悉萬丹部何大何部伏弗郁部羽陵部曰連部匹潔部黎部吐六干部等各以其名馬文皮獻天府遂求爲常皆得交市於和龍密雲之間貢獻不絕太和三年高句麗竊與蠕蠕謀欲取地豆干以分之契丹舊怨其侵軼其莫賀弗勿于李其部落車三千乘衆萬餘口驅徙雜畜求內附止於白狼水東自此歲常朝貢後告饑孝文聽其入關市糴及宣武孝明時恒遣使貢方物熙平中契丹使人初真等

三十人還靈太后以其俗嫁娶之際以青氍爲上服人給青氍兩匹賞其誠款之心餘依舊式朝貢及齊受東魏禪嘗不斷絕天保四年九月契丹犯塞文帝親戎北討至平州遂西趣長蘆詔司徒濟相樂帥精騎五千自東道趣青山復詔安德王韓軌帥精騎四千東趣斷契丹走路帝親踰山嶺奮擊大破之虜十餘萬口雜畜數十萬頭相樂又於青山大破契丹別部所虜生口皆分置諸州其後復爲突厥所逼又以萬家寄於高麗其俗與靺鞨同好爲寇盜父母死而悲哭者以爲不壯但以其屍置於山樹之上經三年後乃收其骨而焚之因酌

酒而祝曰冬月時向陽食若我射獵時使我多得脂鹿其無禮頑嚚於諸夷最甚隋開皇四年率莫賀弗來謁五年悉其衆款塞文帝納之聽居其故地青讓之其國遣使詣闕頓顙謝罪其後契丹別部出伏等背高麗率衆內附文帝見來憐之上方與突厥和好重失遠人之心悉令給糧還本部敕突厥撫納之固辭不去部落漸衆遂北徙逐水草當遼西正北二百里依託紇臣水而居東西亘百里分爲十部兵多者三千少者千餘逐寒暑隨水草畜牧有征伐則酋帥相與議之興兵動衆合如符契突厥沙鉢略可汗遣吐屯潘垵統之契丹殺吐

屯而遁大業七年遣使朝貢方物

室韋國在勿吉北千里去洛陽六千里室或爲失蓋契丹之類其南者爲契丹在北者號爲失韋路出和龍北千餘里入契丹國又北行十日至啜水又北行三日有善水又北行三日有犢了山其山高大周回三百里又北行三百餘里有大水名屈利又北行三日至刃水又北行五日到其國有大水從北而來廣四里餘名捺水國土下濕語與庫莫奚契丹豆婁國同頗有粟麥及稌夏則城居冬逐水草多略貂皮丈夫索髮用角弓其箭尤長女婦束髮作叉手髻其國少竊盜盜一徵二殺人

者責三百匹男女悉衣白鹿皮襦袴有麴釀酒俗愛赤珠爲婦人飾穿掛於頸以多爲貴女不得此乃至不嫁父母死男女衆哭三年尸則置於林樹之上武定二年四月始遣使張烏豆伐等獻其方物迄武定末貢使相尋及齊受東魏禪亦歲時朝聘其後分爲五部不相總一所謂南室韋北室韋鉢室韋深末怛室韋大室韋並無君長人貧弱突厥以三吐屯總領之南室韋在契丹北三千里土地卑濕至夏則移向北貸勃欠對二山多草木饒禽獸又多蚊蚋人皆巢居以避其患漸分爲二十五部每部有餘莫弗瞞咄猶酋長也死則子弟代之

嗣絕則擇賢豪而立之其俗丈夫皆被髮婦女盤髮衣服與契丹同乘牛車以蘧蔭為屋如突厥羶車之狀度水則束薪為棧或有以皮為舟者馬則織草為韉結繩為轡匡寢則木屈為室以蘧蔭覆上移則載行以牯皮為席編木為藉婦女皆抱膝坐氣候多寒田收甚薄無羊少馬多猪牛與靺鞨同俗婚嫁之法二家相許竟輒盜婦將去然後送牛馬為聘更將婦歸家待有孕乃相許隨還舍婦人不再嫁以為死人之妻難以共居部落共為大柵人死則置其上居喪三年年唯四哭其國無鐵取給於高麗多貂南室韋北行十一日至北室韋分

為九部落繞吐紇山而居其部落渠帥號乞引莫賀咄每部有莫何弗二人以貳之氣候最寒雪深沒馬冬則入山居土穴牛畜多凍死饒麀鹿射獵為務食肉衣皮鑿冰沒水中而網取魚鼈地多積雪懼陷阬穿騎木而行俗即止皆捕貂為業冠以狐貂衣以魚皮又北行千里至鉢室韋依胡布山而住人衆多北室韋不知為幾部落用樺皮蓋屋其餘同北室韋從鉢室韋西南四日行至深末怛室韋因水為號也冬月穴居以避太陰之氣又西北數千里至大室韋徑路險阻言語不通尤多貂及青鼠北室韋時遣使貢獻餘無至者

豆莫婁國在勿吉北千里舊北夫餘也室婁之東東至
於海方二千餘里其人士著有居室倉庫多山陵廣澤
於東夷之城最爲平敞地宜五穀不生五果其人長大
性強勇謹厚不寇抄其君長皆六畜名官邑落有豪帥
飲食亦用豆有麻布衣製類高麗而帽大其國大人以
金銀飾之用刑嚴急殺人者死沒其家人爲奴婢俗淫
尤惡妬者殺之尸於國南山上至腐女家始得輸牛馬
乃與之或言穢貊之地也

地豆干國在室韋西千餘里多牛羊出名馬皮爲衣服
無五穀唯食肉酪延興二年八月遣使朝貢至於太和
六年貢使不絕十四年頻來犯塞孝文詔征西大將軍
陽平王頤擊走之自後時朝京師迄武定末貢使不絕
及齊受禪亦來朝貢

烏洛侯國在地豆干北去代都四千五百餘里其地下
濕多霧氣而寒人冬則穿地爲室夏則隨原阜畜牧多
豕有穀麥無大君長部落莫弗皆世爲之其俗繩髮皮
服以珠爲飾人尚勇不爲姦竊故慢藏野積而無寇盜
好射獵樂有箜篌木槽革面而施九弦其國西北有完
水東北流合於難水其小水皆注於難東入海又西北
二十日行有于已尼大水所謂北海也太武眞君四年

朝稱其國西北有魏先帝舊墟石室南北九十步東西四十步高七十尺室有神靈人多祈請太武遣中書侍郎李敞告祭焉刊祝文於石室之壁而還

流求國居海島當建安郡東水行五日而至土多山洞其王姓歡斯氏名渴刺梵不知其由來有國世數也彼土人呼之爲可老羊妻曰多拔茶所居曰波羅檀洞墜柵三重環以流水樹棘爲藩王所居舍其大二十六間瑯刻禽獸多鬪鏤樹似橘而葉密條織如髮之下垂國有四五帥統諸洞洞有小王往往有村村有鳥了帥並以善戰者爲之自相樹立主一村之事男女皆白紵纒髮從項後盤繞至額其男子用鳥羽爲冠裝以珠貝飾以赤毛形製不同婦人以羅紋白布爲帽其形方正織鬪鏤皮并雜毛以爲衣製裁不一綴毛垂螺爲飾雜色相間下垂小貝其聲如珮綴璫施釧懸珠於頸織藤爲笠飾以毛羽有刀稍弓箭劔鉞之屬其處少鐵刀皆薄小多以骨角輔助之編紵爲甲或用熊豹皮王乘木獸令左右輿之而導從不過十數人小王乘机鏤爲獸形國人好相攻擊人皆驍健善走難死耐創諸洞各爲部隊不相救助兩軍相當勇者三五人出前跳噪交言相罵因相擊射如其不勝一軍皆走遣人致謝卽共和

北史卷九十四 列傳 三十五

解收取鬪死者聚食之仍以鬪骸將向王所王則賜之
以冠便爲隊帥無賦歛有事則均稅用刑亦無常準皆
臨事科決犯罪皆斷於烏了帥不伏則上請於王王令
臣下共議定之獄無枷鎖唯用繩縛決死刑以鐵錐大
如筋長尺餘鑽頂殺之輕罪用杖俗無文字望月虧盈
以紀時節草木榮枯以爲年歲人深目長鼻類於胡亦
有小慧無君臣上下之節拜伏之禮父子同牀而寢男
子拔去髭鬚身上有毛處皆除去婦人以墨黥手爲蟲
蛇之文嫁娶以酒珠貝爲娉或男女相悅使相匹偶婦
人產乳必食子衣產後以火自炙令汗出五日便平復
以木槽中暴海水爲鹽木汁爲酢米麴爲酒其味甚薄
食皆用手遇得異味先進尊者凡有宴會執酒者必待
呼名而後飲上王酒者亦呼王名後銜盃共飲頗同突
厥歌呼蹋蹄一人唱衆皆和音頗哀怨扶女子上膊搖
手而舞其死者氣將絕輿至庭前親賓哭泣相弔浴其
屍以布帛縛纏之裹以葦席襯土而殯上不起墳子爲
父者數月不食肉其南境風俗少異人有死者邑里共
食之有熊豺狼尤多嗜雞無羊牛驢馬厥田良沃先以
火燒而引水灌持一鍤以石爲刃長尺餘闊數寸而墾
之宜稻梁禾黍麻豆赤豆黑豆等木有楓栝樟松檉

楠枌梓竹藤果藥同於江表風土氣候與嶺南山類俗
事山海之神祭以肴酒戰鬪殺人便將所殺人祭其神
或依茂樹起小屋或懸髑髏於樹上以箭射之或累石
繫幡以爲神主王之所居壁下多聚髑髏以爲佳人間
門戶上必安獸頭骨角隋大業元年海師何蠻等每春
秋二時天清風靜東望依稀似有煙霧之氣亦不知幾
千里煬帝令羽騎尉朱寬入海求訪異俗何蠻言之遂
與蠻俱往同到流求國言不通掠一人而反明年復令
寬慰撫之不從寬取其布甲而歸時倭國使來朝見之
曰此夷邪夕國人所用帝遣武賁郎將陳稜朝請大夫

張鎮州率兵自義安浮海至高華嶼又東行二日至甌
甌嶼又一日便至流求流求不杖稜擊走之進至其都
焚其宮室虜其男女數千人載軍實而還自爾遂絕
倭國在百濟新羅東南水陸三千里於大海中依山島
而居魏時譯通中國三十餘國皆稱于夷人不知里數
但計以日其國境東西五月行南北三月行各至於海
其地勢東高西下居於邪摩堆則魏志所謂邪馬臺者
也又云去樂浪郡境及帶方郡並一萬二千里在會稽
東與儋耳相近俗皆文身自云太伯之後計從帶方至
倭國循海水行歷朝鮮國乍南乍東七千餘里始度一

海又南千餘里度一海關千餘里名瀚海至一支國又
度一海千餘里名末盧國又東南陸行五百里至伊都
國又東南百里至奴國又東行百里至不彌國又南水
行二十日至投馬國又南水行十日陸行一月至邪馬
臺國即倭王所都漢光武時遣使入朝自稱大夫安帝
時又遣朝貢謂之倭奴國靈帝光和中其國亂遞相攻
伐歷年無主有女子名卑彌呼能以鬼道惑衆國人共
立爲王無夫有二男子給王飲食通傳言語其王有宮
室樓觀城柵皆持兵守衛爲法甚嚴魏景初五年公孫
文懿誅後卑彌呼始遣使朝貢魏主假金印紫綬正始
中卑彌呼死更立男王國中不服更相誅殺復立卑彌
呼宗女臺與爲王其後復立男王並受中國爵命江左
歷晉宋齊梁朝聘不絕及陳平至開皇二十年倭王姓
阿每字多利思比孤號阿輩雞彌遣使詣闕上令所司
訪其風俗使者言倭王以天爲兄以日爲弟天明時出
聽政跣趺坐日出便停理務云委我弟文帝曰此大無
義理於是訓令改之王妻姓雞闕有女六七百人
名太子爲利歌彌多弗利無城郭內官有十二等一曰
大德次小德次大仁次小仁次大義次小義次大禮次
小禮次大智次小智次大信次小信員無定數有軍尼

一百二十人猶中國牧宰八十戶置一伊尼翼如今里
長也十伊尼翼屬一軍尼其服飾男子衣裙襦其袖微
小履如屨形漆其上繫之脚人庶多跣足不得用金銀
爲飾故時衣橫幅結束相連而無縫頭亦無冠但垂髮
於兩耳上至隋其王始制冠以錦綵爲之以金銀鑲花
爲飾婦人束髮於後亦衣裙襦裳皆有櫛鬘竹聚以爲
梳編草爲薦雜皮爲表緣以文皮有弓矢刀稍弩攢斧
漆皮爲甲骨爲矢鏑雖有兵無征戰其王朝會必陳設
儀仗其國樂戶可十萬俗殺人強盜及姦皆死盜者計
贓酬物無財者沒身爲奴自餘輕重或流或杖每訊寃
獄不承引者以木壓膝或張強弓以弦鋸其項或置小
石於沸湯中令所競者探之云理曲者卽手爛或置蛇
瓮中令取之云曲者卽螫手人頗恬靜罕爭訟少盜賊
樂有五弦琴笛男女皆黥臂點面文身沒水捕魚無文
字唯刻木結繩敬佛法於百濟求得佛經始有文字知
卜筮尤信巫覡每至正月一日必射戲飲酒其餘節略
與華同好碁博握槊蒲之戲氣候溫暖草木冬青土
地膏腴水多陸少以小環掛鷓鴣項令入水捕魚日得
百餘頭俗無盤俎藉以櫛葉食用手舖之性質直有雅
風女多男少婚嫁不取同姓男女相悅者卽爲婚婦入

夫家必先跨火乃與夫相見婦人不淫妬死者歛以棺
槨親賓就屍歌舞妻子兄弟以白布制服貴人三年殯
庶人卜日而瘞及瘞置屍船上陸地牽之或以小輿有
阿蘇山其石無故火起接天者俗以爲異因行祭禱有
如意寶珠其色青大如雞卵夜則有光云魚眼睛也新
羅百濟皆以倭爲大國多珍物並仰之恒通使往來大
業三年其王多利思比孤遣朝貢使者曰聞海西菩薩
天子重興佛法故遣朝拜兼沙門數十人來學佛法國
書曰日出處天子致書日沒處天子無恙云云帝覽不
悅謂鴻臚卿曰蠻夷書有無禮者勿復以聞明年上遣
文林郎裴世清使倭國度百濟行至竹島南望耽羅國
經都斯麻國迤在大海中又東至一支國又至竹斯國
又東至秦王國其人同於華夏以爲夷洲疑不能明也
又經十餘國達於海岸自竹斯國以東皆附庸於倭倭
王遣小德何輩臺從數百人設儀仗鳴鼓角來迎後十
日又遣大禮哥多毗從二百餘騎郊勞旣至彼都其王
與世清來貢方物此後遂絕
論曰廣谷大川異制人生其間異俗嗜欲不同言語不
通聖人因時設教所以達其志而通其俗也九夷所居
與中夏懸隔然天性柔順無橫暴之風雖綿邈山海而

易以道御夏殷之世時或來王暨箕子避地朝鮮始有
八條之禁踈而不漏簡而可久化之所感千載不絕今
遼東諸國或衣服參冠冕之容或飲食有俎豆之器好
尚經術愛樂文史游學於京都者往來繼路或沒世不
歸非先哲之遺風其孰能致於斯也故孔子曰言忠信
行篤敬雖蠻貊之邦行矣誠哉斯言其俗之可採者豈
楛矢之貢而已乎自魏迄隋年移四代時方爭競未遑
外略洎開皇之末方征遼左天時不利師遂無功二代
承基志苞宇宙頻踐三韓之地屢發千鈞之弩小國懼
亡敢同困獸兵不載捷四海騷然遂以土崩喪身滅國
兵志有之曰務廣德者昌務廣地者亡然遼東之地不
列於郡縣久矣諸國朝正奉貢無闕於歲時二代震而
矜之以爲人莫已若不能懷以文德遽動干戈內恃富
強外思廣地以驕取怨以怒興師若此而不亡自古未
聞也然四夷之戒安可不深念哉其豆莫婁地豆千烏
洛侯歷齊周及隋朝貢遂絕其事故莫顯云

北史卷九十四終

北史卷九十五

列傳第八十三

蠻獠

林邑

赤土

真臘

婆利

蠻之種類蓋盤瓠之後在江淮之間部落滋蔓布於數州東連壽春西通巴蜀北接汝潁往往有焉其於魏氏不甚為患至晉之末稍以繁昌漸為寇暴矣自劉石亂後諸蠻無所忌憚故其族漸得北遷陸渾以南滿於山谷宛洛蕭條略為丘墟矣道武既定中山聲教被於河

表泰常八年蠻王梅安率渠帥數千朝京師求留質子
以表忠款始光中拜安侍子豹爲安遠將軍江州刺史
順陽公興光中蠻王文武龍請降詔褒慰之拜南雍州
刺史魯陽侯延興中大陽蠻首桓誕擁河水以北瀼葉
以南八萬餘落遣使內屬孝文嘉之拜誕征南將軍東
荊州刺史襄陽王聽自選郡縣誕字天生桓玄之子也
初玄西奔至枚廻洲被殺誕時年數歲流竄大陽蠻中
遂習其俗及長多智謀爲羣蠻所歸誕旣內屬居助陵
太和四年王師南伐誕請爲前驅詔授使持節南征西
道大都督討義陽不果而還十年移居潁陽十六年依
例降王爲公十七年加征南將軍中道大都督征竟陵
遇遷洛師停是時齊征虜將軍直閣將軍蠻首田益宗
率部曲四千餘戶內屬襄陽首雷婆思等十一人率戶
千餘內徙永居大和川詔給廩食後開南陽令有沔北
之地蠻人安堵不爲寇賊十八年誕入朝賞遇隆厚卒
諡曰剛子暉字道進位龍驤將軍東荊州刺史襲爵景
明初大陽蠻首田育等二萬八千戶內附詔置西郡
十八縣暉卒贈冠軍將軍三年魯陽蠻魯北鳶等聚衆
攻逼頻詔左衛將軍李崇討平之徙萬餘家於河北諸
州及六鎮尋叛南走所在追討比及河殺之皆盡四年

東荊州蠻樊素安及僭帝號正始元年素安弟秀安復
友李崇陽大眼悉討平之二年梁沔東太守田清善擁
七郡三十一縣戶萬九千遣使內附乞師討梁其雍州
以東石城以西五百餘里水陸援路請率部斷之四
年梁永寧太守文雲生六部自漢東遣使歸附永寧初
東荊州表太守桓叔興前後招慰太陽蠻歸附者一萬
七百戶請置郡十六縣五十詔前鎮東府長史酈道元
檢行置之然興即暉弟也延昌元年拜南荊州刺史居
安昌隸於東荊三年梁遣兵討江沔破掠諸蠻百姓擾
動蠻自相督率二萬餘人頻請統帥蠻以爲聲勢叔興
給一弁威儀爲之節度蠻人遂安其年梁雍州刺史蕭
藻遣其將蔡令孫等三將寇南荊之西南泐襄沔上下
破掠諸蠻蠻首梁龍驤將軍樊石廉叛梁來請援叔興
遣與石廉督集蠻夏二萬餘人擊走之斬令孫等三將
藻又遣其新陽太守邵道林於沔水之南石城東北立
清水戍爲抄掠之基叔興遣諸蠻擊破之四年叔興上
表請不隸東荊許之梁人每有寇抄叔興必摧破之正
光中叔興擁所部南叛蠻首成龍強率戶數千內附拜
刺史蠻帥田牛生率戶二千內徙揚州拜爲郡守梁義
州刺史邊城王文僧明鐵騎將軍邊城太守田官德等

率戶萬餘舉州內屬拜僧明平南將軍西豫州刺史封
開封侯官德龍驤將軍義州刺史自餘封授各有差僧
明官德並入朝蠻出山至邊城建安者八九千戶義州
尋爲梁將裴邃所陷梁定州刺史田超秀亦遣使求附
請援歷年朝廷恐輕致邊役未之許會超秀死其部曲
相率內附徙之六鎮秦隴所在反叛二荆西郢蠻大擾
動斷三鵠路殺都督寇盜至於襄城汝水百姓多被其
害梁遣將留廣陵楚城諸蠻並爲前驅自汝水以南恣
其暴掠連年攻討散而復合其暴滋甚又有冉氏向氏
田氏者陬落尤盛餘則大者萬家小者千戶更相崇僭
稱王侯屯據三峽斷遏水路荆蜀行人至有假道者周
文略定伊瀍聲教南被諸蠻畏威靡然向風矣大統五
年蔡陽蠻王魯超明內屬授南雍州刺史仍世襲焉十
一年蠻酋梅勒特來貢其方物尋而蠻帥田杜青和及
江漢諸蠻擾動大將軍楊忠擊破之其後蠻帥杜青和
自稱巴州刺史入附朝廷因其所稱而授之杜青和後
遂反攻圍東梁州其唐州蠻田魯嘉亦叛自號豫州伯
王雄權景宣等前後討平之廢帝初蠻首樊舍舉落內
附以爲督淮北三州諸軍事淮州刺史淮安郡公千謹
等平江陵諸蠻騷動詔豆盧寧蔡祐等討破之恭帝二

年蠻酋宜人王田興彥北荊州刺史梅季昌等相繼款附以興彥季昌並爲開府儀同三司加季昌洛州刺史賜爵石臺縣公其後巴蜀西人譙淹扇動羣蠻以附梁蠻帥向鎮侯向白虎等應之向五子王又攻陷信州田烏度田唐等抄斷江路文子榮復據荊州之政陽郡自稱仁州刺史并隣州刺史蒲微亦舉兵逆命詔田弘賀若敦潘和李遷哲等討破之周武成初文州蠻叛州軍討定之尋而冉令賢向五子王等又攻陷白帝殺開府楊長華遂相率作亂前後遣開府元契趙剛等總兵出討雖頗翦其族類而元惡未除天和元年詔開府陸騰督王亮司馬裔等討之騰水陸俱進次于湯口先遣喻之而令賢方增浚城池嚴設扞禦遣其長子西黎次于南王領其支屬於江南險要之地置立土城遠結潁陽蠻爲其聲援令賢率其卒固守水邏城騰乃總集將帥謀進趣咸欲先取水邏然後經略江南騰言於衆曰令賢內恃水邏金湯之險外託潁陽輔車之援兼復資糧充實器械精新以我懸軍攻其巖壘脫一戰不尅更成其氣不如頓軍湯口先取江南翦其毛羽然後遊軍水邏此制勝之計也衆皆然之乃遣開府王亮率衆渡江旬日攻拔其八城凶黨奔散獲賊帥冉承公并生口三

千人降其部衆一千八遂簡募驍勇數道分攻水邏路
經石壁城險峻四面壁立故以名焉唯有一小路緣梯
而上蠻蠻以爲峭絕非兵衆所行騰被甲先登衆軍繼
進備經危阻累日乃得舊路且騰先任隆州總管雅知
其路蠻帥冉伯犁冉安西與令賢有隙騰乃招誘伯犁
等結爲父子又多遺錢帛伯犁等悅遂爲嚮導水邏側
又有石勝城者亦是險要令賢使其兄龍真據之騰又
密告龍真云若平水邏使其代令賢處之龍真大悅遣
其子詣騰乃厚加禮接賜以金帛蠻貪利旣深仍請立
效乃謂騰曰欲翻所據城恐人力寡少騰許以三百兵
助之旣而遣二千人銜枚夜進龍真力不能禦遂平石
勝城晨至水邏蠻衆大潰斬首萬餘級令賢遁走而獲
之司馬喬又別下其二十餘城獲蠻帥并三公等騰乃
積其骸骨於水邏城側爲京觀後蠻蠻望見輒大哭自
此狼戾之心輟矣時向五子王據石墨城令其子寶勝
據雙城水邏平後頗遣喻之而五子王猶不從命騰又
遣王亮屯牢坪司馬喬屯雙城以圖之勝慮雙城孤峭
攻未可拔賊若委城遁散又難追討乃令諸軍周廻立
柵逼其走路賊乃大駭於是縱兵擊破之禽五子王於
石墨獲寶勝於雙城悉斬諸向首領生禽萬餘口信州

舊居白帝騰更於劉備故宮城南八陳之北臨江岸築城移置信州又以巫縣信陵秭歸並築城置防以爲襟帶焉天和六年蠻渠冉祖熹冉龍驤又反詔大將軍趙閭討平之自此羣蠻懼息不復爲寇

獠者蓋南蠻之別種自漢中達于邛笮川洞之間所在皆有種類甚多散居山谷略無氏族之別又無名字所生男女唯以長幼次第呼之其丈夫稱阿暮阿段婦人阿夷阿等之類皆語之次第稱謂也依樹積木以居其上名曰干闌干闌大小隨其家口之數往往推一長者爲王亦不能遠相統攝父死則子繼若中國之貴族也獠王各有鼓角一雙使其子弟自吹擊之好相殺害多死不敢遠行能臥水底持刀刺魚其口嚼食並鼻飲死者豎棺而埋之性同禽獸至於忿怒父子不相避唯手育兵刃者先殺之若殺其父走避外求得一狗以謝不復嫌恨若報怨相攻擊必殺而食之平常劫掠賣取諸狗而已親戚比隣指授相賣被賣者號哭不服逃竄避之乃將買人指捕逐若亡叛獲便縛之但經被縛者卽服爲賤隸不敢稱良矣亡失兒女一哭便止不復追思唯執楯持矛不識弓矢用竹爲篋羣聚鼓之以爲音節能爲細布色至鮮淨大狗一頭買一生口其俗畏鬼神

尤尚淫祀所殺之人美鬢髯者乃剝其面皮籠之於笱
及燥號之曰鬼鼓舞祀之以求福利至有賣其昆季妻
孥盡者乃自賣以供祭焉鑄銅爲器大口寬腹名曰銅
釁既薄且輕易於熟食建國中李勢在蜀諸獠始出巴
西渠川廣漢陽安資中攻破郡國爲益州大患勢內外
受敵所以亡也自桓溫破蜀之後力不能制又蜀人東
流山險之地多空獠遂挾山傍谷與夏人參居者頗輸
租賦在深山者仍不爲編戶梁益二州歲伐獠以禪潤
公私頗藉爲利正始中夏侯道遷舉漢中內附宣武遣
尚書邢巒爲梁益二州刺史以鎮之近夏人者安堵樂
業在山谷者不敢爲寇後以羊祉爲梁州傅豎眼爲益
州祉性酷虐不得物情梁輔國將軍范季旭與獠王趙
清荆率衆屯孝子谷祉遣統軍魏胡擊走之後梁寧朔
將軍姜白復擁夷獠入屯南城梁州人王法慶與之通
謀衆於固門川祉遣征虜將軍討破之豎眼施恩布信
大得獠和後以元法僧代傅豎眼爲益州法僧在任貪
殘獠遂反叛勾引梁其圍逼晉壽朝廷憂之以豎眼先
得物情復令乘傳往撫獠聞豎眼至莫不欣然拜迎道
路於是而定及元桓元子真相繼爲梁州並無德績諸
獠苦之軍後朝廷以梁益二州控攝峻遠乃立巴州以

統諸獠後以巴酋嚴始欣爲刺史又立隆城鎮所緝獠二十萬戶彼謂北獠歲輸租布又與外人交通貿易巴州生獠並皆不順其諸頭王每於時節謁見刺史而已孝昌初諸獠以始欣貪暴相率反叛攻圍巴州山南行臺勉喻卽時散罷自是獠諸頭王相率詣行臺者相繼子建厚勞賚之始欣見中國多事又失彼心慮獲罪譴時梁南梁州刺史陰子春扇惑邊陲始欣謀將南叛始欣族子愷時爲隆城鎮將密知之嚴設邏候遂禽梁使人并封始欣詔書鐵券刀劍衣冠之屬表送行臺子建乃啓以鎮爲南梁州愷爲刺史發使執始欣囚於南鄭

遇子建見代梁州刺史傅豎眼仍爲行臺豎眼久病其子敬紹納始欣重賂使得還州始欣乃起衆攻愷屠滅之據城南叛梁將蕭玩率衆援接時梁益二州並遣將討之攻陷巴州執始欣遂大破玩軍及斬玩以傅曇表爲刺史後元羅在梁州爲所陷自此遂絕及周文平梁益之後令在所撫慰其與華人雜居者亦頗從賦役然天性暴亂旋致擾動每歲命隨近州鎮出兵討之獲其生口以充賤隸謂之爲壓獠焉後有南旅往來者亦資以爲貨公卿達於人庶之家有獠口者多矣恭帝三年陵州木籠獠反詔開府陸騰討破之周保定二年鐵山

獠又反抄斷江路陸騰又攻拔其三城天和三年梁州
桓稜獠叛總管長史趙文表討之軍次巴州文表欲率
衆徑進軍吏等曰此獠旅拒日久部衆甚強討之者四
面攻之以分其勢今若大軍直進不遣奇兵恐併力於
表未可制勝文表曰往者既不能制之今須別爲進趣
若四面遣兵則獠降走路絕理當相率以死拒戰如從
一道則吾得示威恩分遣人以理曉諭爲惡者討之歸
善者撫之善惡旣分易爲經略事有變通奈何欲遵前
轍也文表遂以此意遍令軍中時有從軍熟獠多與桓
稜親識卽以實報之桓稜獠相與聚議猶豫之間文表
軍已至其界獠中先有二路一路稍平一路極險俄有
生獠酋帥數人來見文表曰我恐官軍不識山川請爲
鄉導文表謂之曰此路寬平不須導引卿但先去好慰
諭子弟也乃遣之文表謂其衆曰向者獠帥謂吾從寬
路而行必當設伏險要若從險路出其不慮獠衆自離
散矣於是勒兵從險道進其有不通之處卽平之乘高
而望果見其伏兵獠旣失計爭携妻子退保險要文表
頓軍大蓬山下示禍福遂相率來降文表皆撫慰之仍
徵其租稅無敢動者後除文表爲蓬州刺史又大得人
和建德初李暉爲蓬梁州總管諸獠亦望風從附然其

種滋蔓保據巖壑依山走險若履平地雖屢加兵弗可窮討性又無知殆同禽獸諸夷之中最難以道招懷者也

林邑其先所出事具南史其國延袤數千里土多香木金寶物產大抵與交趾同以磚爲城屋灰塗之東向戶尊官有二其一曰西那婆帝其二曰薩婆地歌其官三等其一曰倫多姓次歌倫致帝次乙地伽蘭外官分爲二百餘部其長官曰弗羅次曰可輪如牧宰之差也王戴金花冠形如章甫衣朝霞布珠璣纓絡足躡革履時服錦袍良家子侍衛者二百許人皆執金裝兵有弓箭

刀槊以竹爲弩傳毒於矢樂有琴笛琵琶五絃頗與中國同每擊鼓以警衆吹蠶以卽戎其人深目高鼻髮拳色黑俗皆徒跣以幅巾纏身冬月衣袍婦人椎髻施椰葉席每有婚媾令媒者齎金銀釧酒二壺魚數頭至女家於是擇日夫家會親賓歌舞相對女家請一婆羅門送女至男家婿盥手因牽女授之王死七日而葬有官者三日庶人一日皆以函盛屍鼓舞導從輿至外次積薪焚之收其餘骨王則內金甕中沉之於海有官者以銅甕沉之海口庶人以瓦送之於江男女皆截髮哭至水次盡哀而止歸則不哭每七日燃香散花復哭盡哀

而止百日三年皆如之人皆奉佛文字同於天竺隋文帝既平陳乃遣使獻方物後朝貢遂絕時天下無事羣臣言林邑多奇寶者仁壽末上遣大將軍劉方爲驩州道行軍總管率欽州刺史甯長真驩州刺史李暉開府秦雄步騎萬餘及犯罪者數千人擊之其王梵志乘巨象而戰方軍不利方乃多掘小坑草覆其上因以兵挑之方與戰僞北梵志逐之其象陷軍遂亂方大破之遂棄城走入其郡獲其廟主十八枚皆鑄金爲之蓋其國有十八世方班師梵志復其故地遣使謝罪於是朝貢不絕

赤土國扶南之別種也在南海中水行百餘日而達所都土色多赤因以爲號東波羅刺國西婆羅娑國南訶羅國北拒大海地方數千里其王姓瞿曇氏名利富多塞不知有國近遠稱其父釋王位出家爲道傳位於利富多塞在位十六年矣有三妻並鄰國女也居僧祇城有門三重相去各百許步每門圖畫菩薩飛仙之象懸金花鈴牦婦人數十人或奏樂或捧金花又飾四婦人容飾如佛塔邊金剛力士之狀夾門而立門外者持兵仗門內者執白拂夾道垂素網綴花王宮諸屋悉是重閣北戶北面而坐三重之榻衣朝霞布冠金花冠垂

雜寶纓絡四女子立侍左右兵衛百餘人主榻後作一木龕以金銀五香木雜鈕之龕後懸一金光焰夾榻又樹二金鏡鏡前並陳金甕甕前各有金香爐當前置一金伏牛前樹一寶蓋左右皆有寶扇婆羅門等數百人東西重行相向而坐其官薩陀加邏一人陀拏達又一人迦利密迦三人共掌政事俱羅末帝一人掌刑法每城置鄒邪迦一人鉢帝十人其俗皆穿耳翦髮無跪拜之禮以香油塗身其俗敬佛尤重婆羅門婦人作髻於項後男女通以朝霞朝雲雜色布爲衣豪富之室恣意華靡唯金鑲非王賜不得服用每嫁婚擇吉日女家先期五日作樂飲酒父執女手以授婿七日乃配既娶卽分財別居唯少子與父居父母兄弟死則剔髮素服就水上構竹木爲棚棚內積薪以屍置上燒香建幡吹蠶擊鼓以送火焚薪遂落於水貴賤皆同唯國王燒訖收灰貯以金瓶藏於廟屋冬夏常溫雨多霽少種植無時特宜稻稔白豆黑麻自餘物產多同於交趾以甘蔗作酒雜以紫瓜根酒色黃赤味亦香美亦以椰漿爲酒隋煬帝嗣位募能通絕域者大業三年屯田主事常駿虞部主事王君政等請使赤土帝大悅遣齎物五千段以賜赤土王其年十月駿等自南海郡乘舟晝夜二旬每

日遇便風至焦石山而過東南詣陵伽鉢拔多洲西與
林邑相對上神祠焉又南行至師子石自茲島嶼連接
又行二三日西望見狼牙須國之山於是南經雞籠島
至於赤土之外其王遣婆羅門鳩摩羅以舶三百艘來
迎吹蠡擊鼓樂隋使至金鑲以纜船月餘至其都王遣
其子那邪迦請與駿等禮見先遣人送金盤貯香花并
鏡鑷金合二枚貯香油金瓶二枚貯香水曰疊布四條
以擬供使者盥洗其日未時那邪迦又將象二頭持孔
雀蓋以迎使人并致金盤金花以藉詔函男女百人奏
羅鼓婆羅門二人導路至王宮駿等奉詔書上閣王以
下皆坐宣詔訖引駿等坐奏天竺樂事畢駿等還館又
遣婆羅門就館送食以草葉爲盤其大方丈因謂駿曰
今是大國臣非復赤土國矣後數日請駿等人宴儀衛
導從如初見之禮王前設兩床床上並設草葉盤方一
丈五尺上有黃白紫赤四色之餅牛羊魚鼈猪螻蝻之
肉百餘品延駿升床從者於地席各以金鍾置酒女樂
迭奏禮遺甚厚尋遣那邪迦隨貢方物并獻金芙蓉冠
龍腦香以鑄金爲多羅葉隱起成文以爲表金函封之
令婆羅門以香花奏蠡鼓而送之旣入海見綠魚羣飛
水上浮海十餘日至林邑東南並山而行其海水色黃

氣腥舟行一日不絕云是大魚糞也循海北岸達于交趾駿以六年春與那邪迦於弘農謁帝帝大悅授駿等執戟都尉那邪迦等官賞各有差

真臘國在林邑西南本扶南之屬國也去日南郡舟行六十日而至南接車渠國西有朱江國其王姓刹氏名質多斯那自其祖漸已強盛至質多斯那遂兼扶南而有之死子伊奢那先代立居伊奢那城郭下一二萬餘家城中有一大堂是其王聽政所總大城三十所城有數千家各有部師官名與林邑同其王三日一聽朝坐五香七寶床上施寶帳以文木爲竿象牙金鈿爲壁狀如

小屋懸金光焰有同于赤土前有金香命二人侍側王著朝霞古貝瞞絡腰腹下垂至脛頭載金寶花冠被真珠纓絡足履革屐耳懸金鐺常服白疊以象牙爲屨若露髮則不加纓絡臣下服制大抵相類有五大臣一曰孤落支二曰相高憑三曰婆何多陵四曰舍摩陵五曰髯羅婁及諸小臣朝於王者輒於階下三稽首王呼上階則跪以兩手抱膊遶王環坐議政事訖跪伏而去階庭門閤侍衛有千餘人被甲持仗其國與參半朱江二國和親數與林邑阨桓二國戰爭其人行止皆持甲仗若有征伐因而用之其俗非王正妻子不得爲嗣王初

立日所有兄弟並刑殘之或去一指或剽其鼻別處供
給不得仕進人形小而色黑婦人亦有白者悉拳髮垂
耳性氣捷勁居處器物頗類赤土以右手爲淨左手爲
穢每旦澡洗以楊枝淨齒讀誦經呪又澡洒乃食食罷
還用楊枝淨齒又讀經呪飲食多酥酪沙糖稬粟米餅
欲食之時先取雜肉羹與餅相和手搗而食娶妻者唯
送女人女擇日遣媒人迎婦男女二家各八日不出晝
夜燃燈不息男婚禮畢卽與父母分財別居父母死小
兒未婚者以餘財與之若婚畢財物入官喪葬兒女皆
七日不食剔髮而喪僧尼道士親故皆來聚會音樂送
之以五香木燒尸收灰以金銀瓶盛送大水之內貧者
或用瓦而以五綵色畫之亦有不焚送屍山中任野獸
食者其國北多山阜南有水澤地氣尤熱無霜雪饒瘴
癘毒蠶宜梁稻少黍粟果菜與日南九真相類異者有
婆羅那娑樹無花葉似柿實似冬瓜菴羅花葉似棗實
似李毗野樹花似木瓜葉似杏實似楮婆田羅樹花葉
實並似棗而小異歌畢佗樹花似林檎葉似榆而厚大
實似李其大如升自餘多同九真海有魚名建同四足
無鱗鼻如象吸水上噴高五六十尺有浮胡魚形似鮐
紫如鸚鵡有八足多大魚半身出望之如山每五六月

中毒氣流行卽以白牘白牛羊於城西門外祠之不然
五穀不登畜多死人疾疫近都有陵伽鉢婆山上有神
祠每以兵二千人守衛之城東神名婆多利祭用人肉
其王年別殺人以夜祠禱亦有守衛者千人其敬鬼如
此多奉佛法尤信道士佛及道士並立像於其館隋大
業十二年遣使貢獻帝禮之甚厚於後亦絕

婆利國自交趾浮海南過赤土丹丹乃至其國國界東
西四月行南北四十五日行王姓刹利邪伽名護濫那
婆官曰獨訶邪拏次日獨訶氏拏國人善投輪其大如
鏡中有竅外鋒如鋸遠以投人無不中其餘兵器與中

國略同俗類真臘物產同於林邑其殺人及盜載其手
姦者鑕其足期年而止祭祀必以月晦盤貯酒肴浮之
流水每十一月必設大祭海出珊瑚有鳥名舍利解人
語隋大業十二年遣使朝貢後遂絕于時南荒有丹丹
盤盤二國亦來貢方物其風俗物產大抵相類云

論曰禮云南方曰蠻有不火食者矣然其種類非一與
華人錯居其流曰蠻曰獠曰俚曰僚曰仡居無君長隨
山洞而居其俗斷髮文身好相攻討自秦并三楚漢平
百越地窮丹傲景極日南水陸可居咸爲郡縣洎乎境
分南北割據各殊蠻獠之族遞爲去就至於林邑赤土

真臘婆利則地隔江嶺莫通中國及隋氏受命剋平九
宇煬帝纂業威加八荒甘心遠夷志求珍異故師出流
求兵加林邑威振殊俗過於秦漢遠矣雖有荒外之功
無救域中之敗傳曰非聖人外寧必有內憂誠哉斯言
也大業中南荒朝貢者十餘國其事跡湮滅今可知者
四國而已

北史卷九十五終

北史卷九十六

列傳第八十四

氏

吐谷渾

宕昌

鄧至

白蘭

党項

附國

稽胡

氏者四夷之別種號曰白馬三代之際蓋自有君長而
世一朝見故詩稱自彼氏羗莫敢不來王也秦漢以來
世居岐隴以南漢川以西自立豪帥漢武帝遣中郎將
郭昌衛廣滅之以其地爲武都自沔渭抵於巴蜀種類

寔繁或謂之白氏或謂之故氏各有侯王受中國封拜
漢建安中有楊騰者爲部落大帥騰勇健多計略始徙
居仇池方百頃爲號四面斗絕高七里餘蟠道三十六
回其上有豐木泉煮土成鹽騰後有名千萬者魏拜爲
百頃氏王千萬孫名飛龍漸強盛晉帝假平西將軍無
子養外甥令狐茂搜爲子惠帝元康中茂搜自號輔國
將軍右賢王羣氏推以爲王關中土人流移者多依之
愍帝以爲驃騎將軍左賢王茂搜死子難敵統位與弟
堅頭分部曲難敵自號左賢王屯下辨堅頭號右賢王
屯河也難敵死子殺立自號使持節龍驤將軍左賢王
下辨公以堅頭子盤爲使持節冠軍將軍右賢王河池
公臣晉晉以殺爲征南將軍三年殺族兄初襲殺殺并
有其衆自立爲仇池公臣於石季龍後稱蕃於晉永和
十年改初爲天水公十一年殺小弟宋奴使姑子梁二
王因侍直手刃殺初初子國率左右誅三王及宋奴復
自立爲仇池公桓溫表國爲秦州刺史國子安爲武都
太守十一年國從叔俊復殺國自立國子安叛苻堅殺
俊復稱蕃於晉死子世自立爲仇池公晉太和三年以
世爲秦州刺史弟統爲武都太守世死統廢世子纂自
立一名德聚黨襲殺統自立爲仇池公遣使詣簡文

帝以蕃爲秦州刺史晉咸安元年苻堅遣楊安伐篡尅之徙其人于關中空百頃之地宋奴之死二子佛奴佛狗逃奔苻堅堅以女妻佛奴子定拜爲尚書領軍苻堅之敗關右擾亂定盡力於堅堅死乃率衆奔隴右徙居歷城去仇池百二十里置倉儲於百頃招夷夏得千餘家自稱龍驤將軍仇池公稱蕃於晉孝武卽以其自號假之後以爲秦州刺史登國四年遂有秦州之地號隴西王後爲乞佛乾歸所殺無子佛狗子盛先爲監國守仇池及統事自號征西將軍秦州刺史仇池公諡定爲武王分諸氏羌爲二十部護軍各爲鎮戍不置郡縣遂有漢中之地仍稱蕃于晉天興初遣使朝貢詔以盛爲征南大將軍仇池王隔礙姚興不得歲通貢使盛以兄子撫爲平南將軍梁州刺史守漢中宋永初中宋武帝封盛爲武都王盛死私諡曰惠文王子玄統位玄子黃眉號征西大將軍開府儀同三司秦州刺史武都王雖蕃於宋仍奉晉永熙之號後始用宋元嘉正朔初盛謂玄曰吾年已老當終爲晉臣汝善事宋帝故玄奉焉玄善於待士爲流舊所懷始光四年太武遣大鴻臚公孫軌拜玄爲征南大將軍督梁州刺史南秦王玄上表請比內蕃許之玄死私諡孝昭王子保宗統位初玄臨終

謂弟難當曰今境候未寧方須撫慰保宗冲昧吾授卿國事其無墜先勳難當固辭請立保宗以輔之保宗既立難當妻姚氏謂難當曰國峻宜立長君及事孺子非久計難當從之廢保宗而自立稱蕃于宋難當拜保宗爲鎮南將軍鎮石昌以次子順爲鎮東將軍秦州刺史守上邽保宗謀襲難當事泄被繫先是四方流人以仇沁豐實多往依附流人有許穆之郝惓之人投難當並改姓爲司馬穆之白云名飛龍惓之白云名康之云是晉室近戚康之尋爲人所殺時宋梁州刺史甄法護刑政不理宋文帝遣刺史蕭思話代任難當以思話未至遣將舉兵襲梁州破白馬遂有漢中之地尋而思話使其司馬蕭道成先驅進討所向尅捷遂平梁州因又附宋難當後釋保宗遣鎮薰亭保宗與兄顯歸京師太武拜保宗征南大將軍秦州牧武都王尚公主保顯爲鎮西將軍晉壽公後遣大鴻臚崔頤拜難當爲征南大將軍儀同三司領護西羌校尉秦梁二州牧南秦王難當後自立爲大秦王號年曰建義立妻爲王后世子爲太子置百官具擬天朝然猶貢獻于宋不絕尋而其國大旱多災異降大秦王復爲武都王太延初難當立鎮上邽太武遣車騎大將軍樂平王丕等督河西高平諸軍

取上邽又詔喻難當奉詔攝守尋而傾國南寇規有蜀
土襲宋益州攻涪城又伐巴西獲維州流人七千餘家
還于仇池宋文帝怒遣將裴方明等伐之難當爲方明
所敗棄仇池與千餘騎奔上邽太武遣中山王辰迎之
赴行宮方明旣尅仇池以保宗弟保熾守之河間公齊
擊走之先是詔保宗鎮上邽又詔鎮駱谷復其本國保
宗弟文德先逃氏中乃說保宗令叛事泄齊執保宗送
京師詔難當殺之氏羌立文德屯于濁水文德自號征
西將軍秦河梁三州牧仇池公求援于宋封文德爲武
都王遣偏將房亮之等助之齊逆擊禽亮之文德奔守
葭蘆武都陰平氏多歸之詔淮陽公皮豹子等率諸軍
討文德走漢中收其妻子寮屬資糧及保宗妻公主送
京師賜死初公主勸保宗反人問曰背父母之邦若何
公主曰禮婦人外成因夫而榮事立據守一方我亦一
國之母豈比小縣之主以此得罪文成時拜難當營州
刺史還爲外都大官卒諡曰忠子和隨父歸魏別賜爵
仇池公子德子襲難當爵早卒子小眼襲例降爲公拜
天水太守卒子大眼別有傳小眼子公熙襲爵正光中
尚書右丞張普惠爲行臺送祖於南秦東益普惠啓公
熙俱行至南秦以氏反不得進遣公熙先慰氏東益州

刺史魏子建以公熙峻薄密令訪察公熙果有潛謀將
爲叛亂子建仍報普惠令其攝錄普惠急追公熙公熙
竟不肯赴東出漢中普惠表列其事公熙大行賄賂終
得免罪後爲假節別將與都督元志同守岐州爲秦賊
莫折天生所虜死於秦州文德後自漢中入統汧隴遂
有陰平武興之地後爲宋荊州刺史劉義宣所殺保宗
之執也子元和奔宋以爲武都白水太守元和據城歸
順文成嘉之拜征南大將軍武都王內徙京師元和從
叔僧嗣復自稱武王於葭蘆僧嗣死從弟文度自立爲
武興王遣使歸順獻文授文度武興鎮將旣而復叛孝
文初征西將軍皮歡喜攻葭蘆破之斬文度首文度弟
汎小名鼠名犯獻文廟諱以小名稱鼠自爲武興王遣
使奉表謝罪貢其方物孝文納之鼠遣子狗奴入侍拜
鼠都督南秦州刺史征西將軍西戎校尉武都王鼠死
從子後起統位孝文復以鼠爵授之鼠子集始爲白水
太守後起死以集始爲征西將軍武都王集始復朝于
京師拜都督南秦州刺史安南大將軍領護南蠻校尉
漢中郡侯武興王賜以車旗戎馬錦綵繒纈尋還武興
進號鎮南將軍加督寧湘五州諸軍事後仇池鎮將楊
靈珍襲破武興集始遂入齊景明初集始來降還授爵

位歸守武興死子紹先立拜都督南秦州刺史征虜將軍漢中郡公武興王贈集始車騎大將軍開府儀同三司諡安王紹先年幼委事二叔集起集義夏侯道遷以漢中歸順也梁白馬戍主尹天保率衆圍之道遷求援於集起集義二人貪保邊蕃不欲救之唯集始弟集朗心願立功率衆破天保全漢川朗之力也集義見梁益旣定恐武興不得久爲外藩遂扇動諸氏推紹先僭稱大號集起集義並稱王外引梁爲援安西將軍邢巒遣建武將軍傅豎眼攻武興尅之執紹先送于京師遂滅其國以爲武興鎮復改鎮爲東益州前後鎮將唐法樂刺史杜纂邢豹以威惠失衷氏豪仇石柱等相率反叛朝廷以西南爲憂正光中詔魏子建爲刺史以恩信招撫風化大行遠近款附如內地焉後唐永代子建爲州未幾氏人悉反永棄城東走自此復爲氏地魏末天下亂紹先奔還武興復自立爲王周文定秦隴紹先稱藩送妻子爲質大統元年紹先請其女妻周文奏魏帝許之紹先死子辟邪立四年南岐州氏苻壽反攻陷武都自號太白王詔大都督侯莫陳順與渭州刺史長孫澄討降之九年清水氏酋李鼠仁據地作亂氏帥梁道顯叛攻南由周文遣典籤趙昶慰諭之鼠仁等相繼歸附

十一年於武興置東益州以辟邪爲刺史十五年安夷
氏復叛趙昶時爲郡守收首逆者二十餘人斬之乃定
於是昶行南秦州事氏帥蓋開等作亂開據北谷其
黨西結宕昌羌獠甘共推蓋開爲主昶分道遣使宣示
禍福然後出兵討之禽蓋開散其餘黨與州叛氏復侵
逼南岐州刺史叱羅協遣使告急昶起救又大破之先
是氏酋楊法深據陰平自稱王亦盛之苗裔也魏孝昌
中舉衆內附自是職貢不絕廢帝元年以深爲黎州刺
史二年楊辟邪據州反羣氏復與同逆詔叱羅協與趙
昶討平之周文乃以大將軍宇文貴爲大都督與州刺
史貴威名先著羣氏頗畏服之來歲楊法深從尉遲迥
平蜀軍迥法深尋與其宗人楊崇集楊陳佺各擁其衆
遞相攻討趙昶時督成武沙三州諸軍事遣使和解之
法深等從命乃分其部落更置州郡以處之恭帝末武
興氏反圍和州鳳州固道氏魏天王等亦聚衆響應大
將軍豆盧寧等討之周明帝時興州人段吒及下辨栢
樹二縣人反相率破蘭臯戍氏酋姜多復率厨中氏屬
攻陷洛聚郡以應之趙昶討平二縣并斬段吒而陰平
葭蘆氏復往屯聚與厨中相應昶乃簡精騎出其不意
徑入厨中至大竹坪連破七柵誅其渠帥二郡並降及

昶還厨中生氏復爲寇掠昶又遣儀同劉崇義宇文琦
入厨中討之於是羣氏並平及王謙舉兵沙氏帥開府
楊永安又據州應謙大將軍達奚儒討平之

吐谷渾本遼東鮮卑徙河涉歸子也涉歸一名奕洛韓
有二子庶長曰吐谷渾少曰若洛鬼涉歸死若洛鬼代
統部落是爲慕容氏涉歸之在也分戶七百以給吐谷
渾與若洛鬼二部馬鬪相傷若洛鬼怒遣人謂吐谷渾
曰先公處分與兄異部何不相遠而馬鬪相傷吐谷渾
曰馬食草飲水春氣發動所以鬪鬪在馬而怒及人乖
別甚易今當去汝萬里外若洛鬼悔遣舊老及長史七

那樓謝之吐谷渾曰我乃昶以來樹德遼右先公之世
卜筮之言云有二子當享福祚並流子孫我是卑庶理
無並大今以馬致怒殆天所啓諸君試驅馬令東馬若
還東我當隨去卽令從騎擁馬令迴數百步欵然悲鳴
突走而西聲若頽山如是者十餘輩一迴一迷樓力屈
乃跪曰可汗此非復人事渾謂其部落曰我兄弟子孫
並應昌盛鬼當傳子及曾玄孫其間可百餘年我乃玄
孫間始當顯耳於是遂西附陰山後假道上隴若洛鬼
追思吐谷渾作阿于歌徒河以兄爲阿于也子孫僭號
以此歌爲輦後鼓吹大曲吐谷渾遂從上隴止於枹罕

自枹罕暨甘松南界昂城龍洞從泝水西南極白蘭數千里中逐水草廬帳而居以肉酪爲糧西北諸雜種謂之阿柴虜吐谷渾死有子六十人長子吐延身長七尺八寸勇力過人性刻暴爲昂城羌酋姜聰所刺劒猶在體呼子葉延語其大將絕拔渥曰吾氣絕棺斂訖便送去保蘭地旣嶮遠又土俗懦弱易控禦葉延小兒欲救餘人恐倉卒終不能相制今以葉延付汝竭股肱之力以輔之孺子得立吾無恨也抽劒而死有子十二人葉延少而勇果年十歲縛草爲人號曰姜聰每旦輒射之射中則嗥叫泣涕其母曰讎賊諸將已屠贖之汝年小何煩朝朝自苦葉延嗚咽若不自勝荅母曰誠知無益然罔極之心不勝其痛性至孝母病母三日不食葉延亦不食頗視書傳自謂曾祖奕洛韓始封昌黎公吾爲公孫之子案禮公孫之子得以王父字爲氏遂以吐谷渾爲氏焉葉延死子碎奚立性淳謹三弟專權碎奚不能制諸大將共誅之奚憂哀不復攝事遂立子視連爲世子委之事號曰莫賀郎華言父也奚遂以憂死視連立以父憂思不遊娛酣宴十五年死弟視羆立死子樹洛干等並幼弟烏紇提立而妻樹洛干母生二子慕瓚利延烏紇提一名大孩死樹洛干立自號車騎將軍是

歲晉義熙初也樹洛干死弟阿豺立自號驃騎將軍沙州刺史部內有黃沙周迴數百里不生草木因號沙州阿豺兼并氏羌地方數千里號爲強國昇西強山觀墊江源問於羣寮曰此水東流更有何名由何郡國入何水也其長史曾和曰此水經仇池過晉壽出宕渠始號墊江至巴郡入江度廣陵入於海阿豺曰水尚知歸吾雖塞表小國而獨無所歸乎遣使通宋獻其方物宋少帝封爲澆河公未及拜受宋文帝元嘉三年又加除命又將遣使朝貢會暴病臨死召諸子弟告之曰先公車騎捨其子虔以大業屬吾豈敢忘先公之舉而私於緯代其以慕瓚繼事阿豺有子二十人緯代長子也阿豺又謂曰汝等各奉吾一隻箭將玩之地下俄而命母弟慕利延曰汝取一隻箭折之慕利延折之曰汝取十九雙箭折之慕延不能折阿豺曰汝曹知不單者易折衆則難摧戮力一心然後社稷可固言終而死慕瓚立先是阿豺時宋命竟未至而死慕瓚又奉表通宋宋文帝又授隴西公慕瓚招集秦涼亡業之人及羌戎雜夷衆至五六百落南通蜀漢北交涼州赫連部衆轉盛太武時慕瓚始遣其侍郎謝大寧奉表歸魏尋討禽赫連定送之京師太武嘉之遣使者策拜慕瓚爲大將軍西秦

王慕璜表曰臣誠庸弱敢竭精欵俘禽僭逆獻捷王府
爵秩雖崇而土不增廓車旗旣飾而財不周賞願垂鑒
察亮其單欵臣須接寇逆疆境之人爲賊所抄流轉東
下今皇化混一求還鄉土乞佛曰連窟略寒張華等三
人家弱在此分垂可愍願并敕遣使恩洽遐荒存亡感
戴太武詔公卿朝堂會議荅施行太尉長孫嵩及議郎
博士二百七十九人議曰前者有司所處以爲秦王荒
外之君本非政教所及來則受之去則不禁皇威遠被
西秦王慕義畏威稱臣納貢求受爵號議者以爲古者
要荒之君雖人土衆廣而爵不擬華夏陛下加寵王官
乃越常分容飾車旗班同上國至於繪絮多少舊典所
無皆當臨時以制豐寡自漢魏以來撫綏遐荒頗有故
事呂后遺單于御車也乘馬二駟單于荅馬千匹其後
匈奴和親敵國遺繪絮不過數百呼韓邪稱臣身自入
朝始乃至萬匹今西秦王若以土無桑蠶便當上請不
得言財不周賞也周室衰微齊侯小白一匡天下有賜
胙之命無益土之賞晉侯重耳破楚城濮唯受南陽之
田爲朝宿之邑西秦所致唯定而已塞外之人因時乘
便侵入秦涼未有經略拓境之勳爵登上國統秦涼河
沙四州之地而云土不增廓比聖朝於弱周而自同於

五霸無慝之情其可極乎西秦王忠欵於朝廷原其本情必不至此或左右不救因致斯累檢西秦流人賊時所抄悉在薄坂今旣稱藩四海咸奉天下一家可救秦州送詣京師隨後遣還所請乞佛三人昔爲賓國之使來在王庭國破家遷卽爲臣妾可勿聽許制曰公卿議之未爲失體西秦王所收金城枹罕隴西之地彼自取之朕卽與之便是裂土何須復廓西秦欵至縣緝隨使踈數增益之非一匹而已自是慕瓚貢獻頗簡又通於宋宋文封爲隴西王太延二年慕瓚死弟慕利延立詔遣使者策謚慕瓚曰惠王後拜慕利延鎮西大將軍儀

同三司改封西平王以慕瓚子元緒爲撫軍將軍時慕利延又通宋宋封爲河南王太武征涼州慕利延懼遂率其部人西遁沙漠太武以慕利延兄有禽赫連定之功遣使宣諭之乃還後慕利延遣使表謝書奏乃下詔褒獎之慕利延兄子緯代懼慕利延害已與使者謀欲自歸慕利延覺而殺之緯代弟叱力延等八人逃歸京師請兵討慕利延太武拜叱力延歸義王詔晉王伏羅率諸將討之軍至大母橋慕利延兄子拾寅走河西伏羅遣將追擊之斬首五千餘級慕利延走白蘭慕利延從弟伏念長史鴉鳩黎部次崇娥等率衆一萬三千落

歸降後復遣征西將軍高梁王那等討之於白蘭慕利
延遂入于闐國殺其王死者數萬人南征蜀賓遣使通
宋求援獻烏丸帽女國金酒器胡王金釧等物宋文帝
賜以牽車七年遂還舊土慕利延死樹洛干子拾寅立
始邑於伏羅川其居止出入竊擬王者拾寅奉脩貢職
受魏正朔又受宋封爵號河南王太武遣使拜爲鎮西
大將軍沙州刺史西平王後拾寅自恃嶮遠頗不恭命
通使于宋獻善馬四疋羊宋明帝加之官號文成時定
陽侯曹安表拾寅今保白蘭多有金銀牛馬若擊之可
以大獲議者咸以先帝忿拾寅兄弟不睦使晉王伏羅
高涼王那再征之竟無多剋拾寅雖復遠遁軍亦疲勞
今在白蘭不犯王塞不爲人患非國家之所急也若遣
使招慰必求爲臣妾可不勞而定也王者之於四荒羈
縻而已何必屠其國有其地安曰臣昔爲澆河戍將與
之相近明其意勢若分軍出其左右拾寅必走保南山
不過十月牛馬草盡人無所食衆必潰叛可一舉而定
也從之詔陽平王新成建安王穆六頭等出南道南郡
公李惠給事中公孫拔及安出北道以討之拾寅走南
山諸軍濟河追之時軍多病諸將議賊已遠遁軍容已
振今驅疲病之卒要難冀之功不亦過乎衆以爲然乃

引還獲駝馬二十餘萬獻文復詔上黨王長孫觀等率
邢郡兵討拾寅軍至曼頭山拾寅來逆戰觀等縱兵擊
敗之拾寅宵遁於是思悔復蕃職遣別駕康盤龍奉表
朝貢獻文幽之不報其使拾寅部落大饑屢寇澆河詔
平西將軍廣川公皮歡喜率敦煌州枹罕高平將軍爲
前鋒司空上黨王長孫觀爲大都督以討觀等軍入拾
寅境芻其秋稼拾寅窘怖遣子詣軍表求改過觀等以
聞獻文以重勞將士乃下詔切責之徵其任子拾寅遣
子斤入侍獻文尋遣斤還拾寅後復擾掠邊人遣其將
良利守洮陽枹罕所統也枹罕鎮將西郡公楊鍾葵貽
拾寅書以責之拾寅表曰奉詔聽臣還舊土故遣良利
守洮陽若不追前恩求令洮陽貢其土物辭旨懇切獻
文許之自是歲脩職貢太和五年拾寅死子度易侯立
遣其侍郎時真貢方物提上表稱嗣事後度易侯伐宕
昌詔讓之賜錦綵一百二十匹喻令悛改所掠宕昌戶
累部送時還易侯並奉詔死子伏連籌立孝文欲令人
朝表稱疾病輒脩洮陽湟和城而置戍焉文明太后崩
使人告凶伏連籌拜命不恭有司請伐之孝文不許羣
臣以其受詔不敬不宜納所獻帝曰拜受失禮乃可加以
詰責所獻土毛乃是臣之常道杜棄所獻便是絕之縱

欲改悔其路無由矣詔曰朕在哀疚之中未存征討而去春枹罕表取其洮陽塗和二戍時此旣邊將之常卽便聽許及偏師致討二戍望風請降執訊二千餘人又得婦女九百口子婦可悉還之伏連乃遣世子賀魯頭朝于京師禮錫有加拜伏連籌使持節都督西垂諸軍事征西將軍領護西戎中郎將西海郡開國公吐谷渾王麾旗章授之飾皆備給之後遣兼員外散騎常侍張禮使於伏連籌謂禮曰昔與宕昌通和恒見稱大王已有自名今忽名僕而拘執此使將命偏師往問其意禮曰君與宕昌並爲魏蕃而比輒有興動殊違臣節當發之日宰輔以爲君若返迷知罪則克保蕃業脫守愚不改則禍難將至伏連籌遂嘿然及孝文崩遣使赴哀盡其誠敬伏連籌內脩職貢外并戎狄塞表之中號爲強富准擬天朝樹置官司稱制諸國以自誇大宣武初詔責之曰梁州表送卿報宕昌梁彌邕與卿並爲邊附語其國則隣藩論其位則同列而稱書爲表名報爲旨有司以國常刑殷勤請討朕慮險遠多虞輕相構惑故先宣此意善自三思伏連籌上表自申辭誠懇至終宣武世至於正光犛牛蜀馬及西南之珍無歲不至後秦州城人莫折念生反河西路絕涼州城人萬于菩提等東

應念生囚刺史宋頴頴密遣求援於伏連籌伏連籌親率大衆救之遂獲保全自爾以後關徼不通貢獻遂絕伏連籌死子夸呂立始自號爲可汗居伏俟城在青海西十五里雖有城郭而不居恒處穹廬隨水草畜牧其地東西三千里南北千餘里宮有王公僕射尚書及郎中將軍之號夸呂椎髻珥珠以皂爲帽坐金獅子牀號其妻爲母尊衣織成裙披錦大袍辮髮於後首戴金花冠其俗大丈夫衣服略同於華夏多以羅罽爲冠亦以繒爲帽婦人皆貫珠貝束髮以多爲貴兵器有弓刀甲稍國無常賦須則稅富室商人以充用焉其刑罰殺人

及盜馬死餘則徵物以贖罪亦量事決杖刑人必以氈蒙頭持石從高擊之父兄死妻後母及嫂等與突厥俗同至於婚貧不能備財者輒盜女去死者亦皆埋殯其服制葬訖則除之性貪婪忍於殺害好射獵以肉酪爲糧亦有種田有大麥粟豆然其北界氣候多寒唯得蕪菁大麥故其俗貧多富少青海周回千餘里海內有小山每冬冰合後以良牝馬置此山至來春收之馬皆有孕所生得駒號爲龍種必多駿異吐谷渾嘗得波斯草馬放入海因生驄駒能日行千里世傳青海驄者也土出犛牛馬騾多鸚鵡饒銅鐵朱砂地兼鄯善且末與和

中齊神武作相招懷荒遠蠕蠕既附於國夸呂遣使致
敬神武喻以大義徵其朝貢夸呂乃遣使人趙吐骨真
假道蠕蠕頻來東魏又薦其從妹靜帝納以爲嬪遣員
外散騎常侍博靈擿使於其國夸呂又請婚乃以濟南
王匡孫女爲廣樂公主以妻之此後朝貢不絕及西魏
大統初周文遣儀同潘潛喻以逆順之理於是夸呂再遣
使獻能舞馬及羊牛等然寇抄不已緣邊多被其害廢
帝二年周文勒大兵至姑臧夸呂震懼使貢方物是歲
夸呂又通使於齊涼州刺史史寧規知其還襲之於州
西赤泉獲其僕射乞伏觸狀將軍翟潘密商胡二百四
十人駝騾六百頭雜綵絲絹以萬計恭帝三年史寧又
與突厥木杆可汗襲擊夸呂破之虜其妻子獲珍物及
雜畜武成初夸呂復寇涼州刺史是云寶戰沒賀蘭祥
宇文貴率兵討之夸呂遣其廣定王鍾留王拒戰祥等
破之廣定等遁走又拔其洮陽洪和二城置洮州而還
保定中夸呂前後三輩遣使獻方物天和初其龍涸王
莫昌率來降以其地爲扶州二年五月復遣使來獻建
德五年其國大亂武帝詔皇太子征之軍至伏侯城夸
呂遁走虜其餘衆而還明年又再遣使奉獻宣政初其
趙王他婁屯來降自是朝獻遂絕及隋開皇初侵弘州

地曠人梗廢之遣上柱國元諧率步騎數萬擊之賊悉
發國中自曼頭至樹敦甲騎不絕其所署河西總管定
城王鍾利房及其太子可博汗前後來拒戰諧頻破之
夸呂大懼率親兵遠遁其名王十三人召率部落而降
上以其高寧王移茲衰素得衆心拜大將軍封河南王
以統降衆自餘官賞各有差未幾復來寇邊州刺史皮
子信拒戰死之汶州總管梁遠以銳卒擊之乃奔退俄
而入寇廓州州兵擊走之夸呂在位百年屢因喜怒廢
殺太子其後太子懼殺遂謀執夸呂而降請兵於邊吏
秦州總管河間王計應之上不許太子謀泄爲其父所
殺復立少子鬼王訶爲太子疊州刺史杜祭請因其釁
討之上又不許六年鬼王訶復懼父誅謀歸國請兵迎
接上謂其使者曰溥天之下皆是朕臣妾各爲善事卽
朕稱心鬼王旣有好意欲來投服唯教鬼王爲臣子法
不可遠遣兵馬助爲惡事鬼王乃止八年其名王拓拔
木彌請以千餘家歸化上曰叛天背父何可收納又其
本意正自避死若今違拒又復不仁若有音信宜遣慰
撫任其自投不須出兵馬應接其妹夫及甥欲來亦任
其意不勞勸誘也是歲河南王移茲衰死文帝令其弟
樹歸襲統其衆平陳之後夸呂大懼逃遁險遠不敢爲

寇十一年夸呂卒子世伏使其兄子無素奉表稱藩并
獻方物請以女備後庭上謂無素曰若依來請他國便
當相學一許一塞是謂不平若並許之又非好法竟不
許十一年遣刑部尚書宇文弼撫慰之十六年以光化
公主妻世伏上表稱公主爲天后上不許明年其國大
亂國人殺世伏立其弟允伏爲主使陳廢立事并謝專
命罪且請依俗尚主上從之自是朝貢歲至而常訪國
家消息上甚惡之煬帝卽位伏允遣子順來朝時鐵勒
犯塞帝遣將軍馮季慈出敦煌禦之戰不利鐵勒遣使
謝罪請降帝遣黃門侍郎裴矩慰撫之諷令擊吐谷渾
以自效鐵勒卽勒兵襲破吐谷渾伏允東走保西平境
帝復令觀德王雄出澆河許公宇文述出西平掩之大
破其衆伏允遁逃於山谷間其故地皆空自西平臨羌
城以西且末以東祁連以南雪山以北東西四千里南
北二千里皆爲隋有置郡縣鎮戍發天下輕罪徒居之
於是留順不之遣伏允無以自資率其徒數千騎客於
党項帝立順爲主送出玉門令統餘衆以其大寶王泥
洛周爲輔至西平其部下殺洛周順不果入而還大業
末天下亂伏允復其故地屢寇河右郡縣不能制吐谷
渾北有乙弗勿敵國國有屈海海周迴千餘里衆有萬

落風俗與吐谷渾同然不識五穀唯食魚及蘇子蘇子
狀若中國枸杞子或赤或黑有契翰一部風俗亦同特
多狼白蘭山西北又有可蘭國風俗亦同目不識五色
耳不聞五聲是夷蠻戎狄之中醜類也土無所出直大
養羣畜而戶落亦可萬餘人頑弱不知鬪戰忽見異人
舉國便走性如野獸體輕工走逐不可得白蘭西南二
千五百里隔大嶺又度四十里海有女王國人庶萬餘
落風俗土著宜桑麻熟五穀以女爲王故因號焉譯使
不至其傳云然

宕昌羌者其先蓋三苗之胤周時與庸蜀微盧等八國

從武王滅商漢有先零燒當等世爲邊患其地東接中
華西通西域南北數千里姓別自爲部落酋帥皆有地
分不相統攝宕昌卽其一也俗皆土著居有屋宇其屋
織犂牛尾及殺羊毛覆之國無法令又無徭賦唯戰伐
之時乃相屯聚不然則各事生業不相往來皆衣裘褐
收養犂牛羊豕以供其食父子伯叔兄弟死者卽以繼
母世叔母及嫂弟婦等爲妻俗無文字但候草木榮落
記其歲時三年一相聚殺牛羊以祭天有梁慙者世爲
酋帥得羌豪心乃自稱王焉勲孫彌忽太武初遣子彌
黃奉表求內附太武嘉之遣使拜彌忽爲宕昌王賜彌

黃爵甘松侯彌忽死孫彪子立其地自仇池以西東西
千里靡水以南南北八百里地多山阜人二萬餘落世
脩職貢頗爲吐谷渾所斷絕彪子死彌治立彪子弟羊
子先奔吐谷渾遣兵送羊子欲奪彌治位彌治遣使請
救獻文詔武都鎮將宇文生救之羊子退走彌治死子
彌機立遣其司馬利柱奉表貢方物楊文度之叛圍武
都彌機遣其二兄率衆救武都破走文度孝文時遣使
于橋表貢朱砂鷓黃白石膽各一百斤自此後歲以爲
常朝貢相繼後孝文遣鴻臚劉歸謁者張察拜彌機征
南大將軍西戎校尉梁益二州牧河南公宕昌王以助
之周文命章武公遵率兵送之

鄧至者白水羌也世爲羌豪因地名號自稱鄧至其地
自亭街以東平武以西汶嶺以北宕昌以南上風習俗
亦與宕昌同其王儉舒治遣使內附高祖拜龍驤將軍
鄧至王遣貢不絕鄧至之西有赫羊國初其部內有一
羊形甚大色至鮮赤故因爲國名又有東亭衛大赤水
寒宕石河薄陵下習山倉驤覃水等諸羌國風俗麤獷
與鄧至國不同焉亦時遣貢使朝廷納之皆假之以雜
號將軍子男渠帥之名

白蘭者羌之別種也其地東北接吐谷渾西北利模徒

南界鄒鄂風俗物產與宕昌略同周保定元年遣使獻犀甲鐵鎧

党項羌者三苗之後也其種有宕昌白狼皆自稱獼猴種東接臨洮西平西拒葉護南北數千里處山谷間每姓別爲部落大者五千餘騎小者千餘騎織犂牛尾及粘纏毛爲屋服裘褐披氍毹爲上飾俗尚武力無法令各爲生業有戰陣則屯聚無徭役不相往來養犂牛羊猪以供食不知稼穡其俗淫穢蒸報於諸夷中爲甚無文字但候草木以記歲時三年一聚會殺牛羊以祭天八年八十以上死者以爲令終親戚不哭少死者則云天

枉其悲哭之有琵琶橫吹擊缶爲節魏周之際數來擾邊隋文帝爲丞相時中原多故因此大爲寇掠蔣公梁睿旣平王謙請因還師討之開皇元年有千餘家歸化五年拓拔寧叢等各率衆詣旭州內附授大將軍其部下各有等差十六年復寇會州詔發隴西兵討之大破其衆人相率降遣子弟入謝罪帝謂曰還語爾父兄人生須有定居養老長幼乃乍還乍走不羞鄉里邪自是胡貢不絕

附國者蜀郡西北二千餘里卽漢之西南夷也有嘉良夷卽其部所居種姓自相率領土俗與附國同言語少

殊不統一其人並無姓氏附國王字宜繪其國南北八
百里東西千五百里無城柵近川谷傍山險俗好復讎
故壘石爲礮以避其患其礮高至十餘丈下至五六丈
每級以木隔之基方三四步礮上方二三步狀似浮圖
於下致級開小門從內上通夜必關閉以防賊盜國有
重罪者罰牛人皆輕捷便擊劒漆皮爲牟甲弓長六尺
竹爲箭妻其羣母及嫂兄弟父兄亦納其妻好歌舞鼓
簧吹長角有死者無服制置屍高牀之上沐浴衣服以
牟甲覆以獸皮子孫不哭帶甲舞劒而呼云我父爲鬼
所取我欲報寃殺鬼自餘親戚哭三聲而止婦人哭必
兩手掩面死家殺牛親屬以猪酒相遺共飲噉而瘞之
死後一年方始大葬必集親賓殺馬動至數十匹立木
爲祖父神而事之其俗以皮爲帽形圓如鉢或戴罽羅
衣多毳皮裘全剝牛腳皮爲靴項繫鐵鎖手貫鐵釧王
與酋帥金爲首飾胷前懸一金花徑三寸其土高氣候
涼多風少雨宜小麥青稞山出金銀銅多白雉水有嘉
魚長四尺而鱗細大業四年其王遣使素福等八人入
朝明年又遣其弟子宜林率嘉良夷六十人朝貢欲獻
良馬以路險不通請開山道修職貢物煬帝以勞人不
許嘉良有水闊六七十丈附國有水闊百餘丈並南流

用皮爲舟而濟附國有薄緣夷風俗亦同西有女國其
東北遶山綿亘數千里接於党項往往有羌大小左封
昔衛葛延白狗向人望族林臺春桑利豆迷桑婢藥大
硤白蘭北利摸徒鄆鄂當迷渠步桑悟千礪並在深山
窮谷無大君長其風俗略同於党項或役屬吐谷渾或
附國大業中朝貢緣西南邊置諸道總管以管之

稽胡一曰步落稽蓋匈奴別種劉元海五部之苗裔也
或云山戎赤狄之後自離石以西安定以東方七八百
里居山谷間種落繁熾其俗土著亦知種田地少桑蠶
多衣麻布其丈夫衣服及死亡殯葬與中夏略同婦人
則多貫蚤貝以爲耳頸飾與華人錯居其渠帥頗識文
字言語類夷狄因譯乃通蹲踞無禮貪而忍害俗奸淫
穢女尤甚將嫁之夕方與淫者叙離夫氏聞之以多爲
貴旣嫁頗亦防閑有犯姦者隨事懲罰又兄弟死者皆
納其妻雖分統郡縣列於編戶然輕其徭賦有異華人
山谷阻深者又未盡役屬而兇悍恃險數爲寇魏孝昌
中有劉蠡升者居雲陽谷自稱天子立年號署百官屬
魏氏亂力不能討蠡升遂分遣部衆抄掠汾晉之間略
無寧歲神武遷鄴後始密圖之乃僞許以女妻蠡升太
子蠡升遂遣子詣鄴齊神武厚禮之緩以婚期蠡升旣

侍和親不爲之備魏大統元年三月齊神武襲之蠡升
率輕騎出外徵兵爲其北部王所殺送於神武其衆復
立蠡升第三子南海王爲主神武滅之獲其僞主及弟
西海王并王后夫人王公以下四百餘人歸於鄴居河
西者多恃險不賓時周文方與神武爭衡未遑經略乃
遣黃門侍郎楊樹就安撫之五年黑水部衆先叛七年
別帥夏州刺史劉平伏又據上郡反自是北山諸部連
歲寇暴周文前後遣于謹侯莫陳崇李弼等相繼討平
之武成初延州稽胡郝阿保狼皮率其種人附於齊氏
阿保自置丞相狼皮自置有柱國并與其別帥劉彖德共
爲影響柱國豆盧寧督諸軍擊破之二年狼皮等餘黨
復叛詔大將軍韓果討破之保定中離石生胡數寇汾
北敷州刺史韋孝寬於險要築城置兵糧以遏其路及
楊忠與突厥伐齊稽胡等便懷旅拒不供糧餼忠乃詐
其酋帥云與突厥迴兵討之酋帥等懼乃相率供饋焉
其後丹州綏州等部內請胡與蒲州別帥郝協郎等又
頻年逆命復詔達奚震辛威于寔等前後窮討散其種
落天和二年延州總管宇文盛率衆城銀州稽胡白郁
久同喬是羅等欲邀襲盛並討斬之又破其別帥爲喬
三勿同等五年開府劉雄出綏州巡檢北邊川路稽胡

帥白郎喬素勿同等度河逆戰雄復破之建德五年武
帝敗齊師於晉州乘勝逐北齊人所棄甲仗未暇收歛
稽胡乘間竊出並盜而有之乃立蠡升孫沒鐸爲主號
聖武皇帝年曰石平六年武帝定東夏將討之議欲窮
其巢穴齊王憲以爲種類旣多又山谷阻絕王師一舉
未可盡除且當翦其魁帥餘加慰撫帝然之乃以憲爲
行軍元帥督行軍總管趙王招譙王儉滕王迥等討之
憲軍次馬邑乃分道俱進沒鐸遣其黨天柱守河東又
遣其大帥穆支據河西規欲分守險要犄角憲軍憲命
譙王儉擊破之斬獲千餘級趙王招又禽沒鐸衆盡降
之自是寇盜頗息

宣政元年汾胡帥劉父羅千覆瓜越王盛督諸軍討禽
論曰氏羌吐谷渾等曰殊俗別處邊陲考之前代屢經
叛服窺覘首鼠蓋其本性夫無德則叛有道則伏先王
所述荒服也

